

ESUS CHUIBENEQUIDON NAID

Esus aton Papan abuc indote

¹⁻² Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. ³ Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampänëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. ⁴ Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. ⁵ Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

⁶ Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantianu. Chui —capanëdash Esus chuiquin. ⁷ Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. ⁸ Aden chuishumbic: —Aton Mayan Nuquin Papan meniac

aidënquoio tantiamequin pausunac ëbi chuibenequidquoio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

⁹ Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

¹⁰ Adec Esusbëd chobedo isec tabadnubien dashcute ushumbocquid dasiuidquid daëd choash tabadec: ¹¹ — Nidaid Cadidia caid yacnoësh choquido, ¿atotsi quiaash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abëd macuësh Odibos caid yacno chobedo Edusaden caid yacno nidoapanëdash. Chonoadtemaid ushë nec, quec aidtiontsëqui capunëdash. Aido Edusaden yacno choash abuc quënë yacno abi tabadbocono dectatoash tabadoapanëdash. ¹³ Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidtedi Esusën ëbi chuibeneta caido aid

quënë nuntan tabadnubi ¹⁴ utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash.

¹⁵ Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: ¹⁶⁻¹⁷ — Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash. ¹⁸ Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquiash paëdec aton pucu tishidpac caondash. ¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuëmbededpondash. ²⁰ Adembidi ëndenquimboshë Udas pado tishabicnuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aibidi aton matses nibëdquid shubu icpanuna.”

Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:

“Aidën icsain nacpaden tanenquiocquin ma utsin bëdamboen napanuna,”

quequin Dabid padon dada uapampic —quepanëdash Petedo. ²¹ Aden chiashic abi onquec: —Udas pado nibëdnuc Esus chuibeneta quequin abentsëc nuquitedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantia. ²² Esus Uan padon acten mentosho isash niamëdenquio yec Esusbëd capucueneshun Esus indosho isquidquio icsho, Esus chuibeneta, quequin nuqui

chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanëdash Petedo iccuededquido chiec.

²³ Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuipanëdash aidon. Ambi istuidaid abentsëc Ose cashun Badsabas cashumbic Ustus, quequin cuënaid nepanëdash. Utsibic, Matias cuëmëdquid icpanëdash. Nëid daëd Petedon chuibocpadquid nec, qesho tantiashun: —Nënantanquio tabadec cho —cac abi daëdi choash tabadsho isash ²⁴ Nuquin Papa chiec nadec iccuededquido onquepanëdash: —Nënantanquio chomeboed nëid daëd iqueque. Is, Papa. ¿Mitsicquidimbi Esus chuibeneta, cape? Èbitedi tantiamе, Papa. ²⁵ Udas pado tauditiadpambo chian anëdënquiacno nidboedën nauidaid namenu, quequin mimbi bëdamboen isaid abentsëc ëbi isme. Papa. Aden mimbi ismiac ma aidëntsen Esus chuibenepanuna —quepanëdash Nuquin Papa chiec. ²⁶ Aden chuitanquimbic aid daëd abi cuëmëdquid abentse-abentsen dada uatempin dada uashumbic tëchun sandoshon cadotaniac dada uatempi abia puduenaid istanquin, Matias cuëmëdquid nec, quequin isbededboshic, Esusën ëbi chuibeneta caido onseted icboedi nëbi Matiasbëd doseted yanosh, quequin chuibededpanëdash nuntan iccuededquidtedishumbi.

2

Aton Mayan Esus tantiaquidtedi menebanaid

¹ Adashic isadaidbon ambi aton tiedën caniquid abia ëshëaid bedaid tantiaid ushë chotsëcnubi Esus tantiaquidtedi shubunuëshi iccuededoapanëdash. ² Ambo iccuededquimbi badedquio shubu nuntan cunquequid dapa

choec natiambo cunquiacbimboecsho abitedishun isbededpanëdash. ³ Aden aid isbedednubi cuëte dëtsisidacbimboecquid budec mais-maisec Nuquin Papan Mayan matsadtocuededpanëdash abi isquidtedi. ⁴ Nuquin Papan ma aidobëd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanëdash ambi matsadtomiaidotedi.

⁵ Aden Nuquin Papan aton Mayan menenubien isadaidbo utsibo Edusaden yacno cho-choash dadpen tabadpanëdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoësh Edusaden yacno cho-chopanëdash. ⁶ Ambo cho-choash tabadnubi Nuquin Papan aton Mayan meniaid-meniaidquiec nëmbobi choquidon onqueten-onquetenquiec onquesho tantiash nëbi chochoboedo utsi-utsiec: ⁷ —¡Padtec! Dacuëdanquiopaic. Èbipadquiecshenda onquepec. ¿Onquequidotedi nidaid Cadidia yacnoquidoda nepec? ⁸ ¿Mitsipaden con onquete bedash onquecuededpec nec? ⁹ Èbitedi nidaid utsi-utsiec yacnoësh cho-choquido nebi. Padtia yacnoësh choquido; utsibic, Media yacnoësh choquido; utsibic, Edan yacnoësh choquido; utsibic, Mesopotamia yacnoësh choquido; utsibic, Udeya yacnoësh choquido; utsibic, Capadosia yacnoësh choquido; utsibic, Ponto yacnoësh choquido; utsibic, Asia yacnoësh choquido; ¹⁰⁻¹¹ utsibic, Pidiquia yacnoësh choquido; utsibic, Pampidia yacnoësh choquido; utsibic, Equipito yacnoësh choquido; utsibic, Dibia Sidene udictsëcuësh choquido; utsibic, shubu dadpen icquid Doma caid yacnoësh choquido; utsibic, acte nënantan nidaid nacrëdquid Quideta caid yacnoësh choquido; utsibic, Adabia caid yacnoësh choquido. Isadaidbobëd isadaidbopadquio icnuequido Edusaden caid yacno tsusedpabon chiampicpaden

nanuec cho-chobedo ëbitedi nebi. Ëbibimboec onquequidtedishun Nuquin Papan naid chuibancho tantiemi. ¹² ¿Mitsipaden tantiaquin oncamiaquien adec onquepec? —quepanëdash Edusaden yacno cho-choquid.

¹³ Adnubien: —¿Bëdamboec onquepequida onquec? Paëmbocquid cubudquin acshun tantienquiocquido neapanui —queoapanëdash utsibo.

Iccuededquido Petedon chuibanaid

¹⁴ Adec onquesho tantiaishun Esusën ëbi chuibeneta caido cho-choquin Petedon nidtoshon tantiamenu quequin naden cho-chobedo comapenec onquequin chuipanëdash: —Mimbi icsamboen tantiaid chiembique. Tantiata.

¹⁵ Ushë abuctotsëcnubi ëbitedishun paëmbocquid acamboccombi.

¹⁶ Utsin-utsinquec onqueten onquesho mimbi tantiaid Nuquin Papan ëndenquimboshë chiampicpadec onquec nebi. Tsusedpa Oedëmbi Nuquin Papan ma matsesbëd tabadnueshun aton Mayan menenun chiaid naden aidën dada uampic:

¹⁷ ‘Nëid nidaid naimbudnubi

Con Mayan matses utsi-utsien menendambi.

Aidon madobobëdtan aidon champibontsen ëmbi yuecquio icshun nanun chiaid chuibanendac.

Adembidi caniabontsen ushquin ëmbi chiacpaden isendac.

Adembidi tsusiobontsen ushquin ëmbi chiacpaden isendac.

¹⁸ Aden con Mayan meniac ambi tantiacpadomboembidi ëmbi chuiquin namiaidon dadan chidobëdtan

ëmbi yuecquio icshun nanun chiaidquiobidi chuibanoindac.

¹⁹ Adembidi, con Mayanën tantiamiac ëmbi yuecquio icshun nanun chiaid matsesën chuibanubien abucüesh uinsadpamboctequid icnubi

nidaidēnshun ismete intacimboectequidbēdtabi nēdēn-
 quetequid cuēte pushudquidbimboectequid abe-
 mbi pushudquidbēdta adquidtedi mibi ismen-
 dambi.

²⁰ Adquid icnuc badiadēn ushē chēnquenquiocnoc
 inchēshacimboectequid inchēshēn ushē piu-piupambo
 yec intacimboecsho mimbi isbededendac.

Ēmbi ismiaidtedi icambi matses cuidte ushē choendac.

²¹ Ismequimbi con Icbombo nec ēbi caquidquio
 mēnchiquendambi,

quequin Nuquin Papan chuimiapaden Oedēn dada uap-
 pampic.

²² “Adembidi Nuquin Papan chomiaid chiembique. Tan-
 tiata, isadaidbo. Nasaded caid yacnoēsh choquid, Esus,
 Nuquin Papan chomiaid icquin nadatiambocquin naban-
 quin ismebansho mimbi isondac. ²³ Aidi Nuquin Pa-
 pan tantiampicpaden Esus bedshun mimbi isadaidpembo
 chuiquid menequin, Unēs uata, cac cuesten dectanquin
 Esus unēs uapanēdash. ²⁴ Aden mimbi nac unēsacsho ic-
 saisa chococacno yuec ictiapimbo iquec, qeshun Nuquin
 Papan Esus uincuemepanēdash. ²⁵ Adembidi ēndenquim-
 boshē tsusedpa Dabid padon Esus chuibanquin naden
 dada uapampic:

‘Con Icbo abuc nidec bēyucanquid ēbēd tsadacimboec-
 sho isec nebi.

Aidi con dayun tsadquid icsho isquin natiaic cametequid
 dacuēdēnenquio iquendambi.

²⁶⁻²⁷ Aid unēsash uincuenta tantiec ēbitsen uincuenend-
 abi, Papa, quec cuēdēnec bēdambo iquebi.

²⁸ Nuquin Papa yacno tabadacpadec nidaidēn tabadquin
 ismiac

mibi yacno nidash mibēdi tabadec bēdamboshē iquebi
 mimbi camiaid iquendabi,

quequin Esus tantiaquin Dabid padon dada uapampic.

²⁹ “Adomboen tantiaquin dada uash Dabid unēsacsho chococapampid nēbi shēcuē iquec. ³⁰ Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ēndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon.

³¹ Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unēsacsho chococahui aton nami chodquenquio yec uincuenendac, quequin chuipampic Dabid padon.

³² Ai, Dabid padon chiampicpadembi Nuquin Papan Esus uincuemeapanēdash. Aid uincuemiasho isondaic icquin mibitedi chuibanec nebi. ³³ Aid uincuenash Nuquin Papan dayunquio tabadendac nēbi. Ambo choacsho matses tantiaquin Nuquin Mayan ma aibēd tabadneshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquiec onquesho nēbi mibitedishun tantiec. ³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic: ‘Nuquin Papa Icbo Dapa icquin abipadquid icbo cain: Nēbi ēbēdi tsadec cho.

³⁵ Mibi chieshēnquido dēniacquidquio mibi icmenun nabono. Chiata,’ quequin Nuquin Papan nanun chiaid Dabid padon dada uapampic.

³⁶ “Aden tantiaquin Dabid padon chuipampid Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash. Adoac ěmbi chiaid abimbo iqueque. Esus tantiaquidquio icta, isadaidbo —quepanēdash Petedo.

³⁷ Aden Petedon chuisho tantiash iccuededquido abi icsaid tantiec unësquio yec: —Esus tantianuequin jatotsi nuqui nape? —quepanëdash utsi-utsiec Petedobëdta Esusën ëbi chuibeneta caid utsibo chiec.

³⁸ Adoaquien Petedo: —Mibi icsaid ënshun, Esus con Icbombo nec, quequin abimbo tantiaquin acten mentometa ma ëbi icsaid Nuquin Papa bëpiscudnu queshun. Adoacsho aton Mayan mibi menendac. ³⁹ Adembidi tantiasho isun min tsyuecquidtsen menendac. Adembidi nidaidtedi yacnocquidën tantiasho isun aton Mayan me-neoaindac ambi chiampicpaden —quepanëdash Petedo Esus isquidquio.

⁴⁰ Aden chuibanequi: —Mimbi icsamboen tantiaid ënta. Aden ënash Esus tantiaquidquio icta —quequin chuibudquin Petedon ëmpanëdash.

⁴¹ Aden chuisho tantiash, Tantiaquiemi, quepanëdash utsi-utiec. Aid ushëmbi dadpenquioshë tedes midted Esus tantiaquid yampanëdash. Adquid icsho isun acten mentobampanëdash.

Esus tantiaquido iccuededaid

⁴² Adashic, Esus tantiemi, queboedo tantiabenabi iquec Esusën ëbi chuibeneta caidon Esus chuibansho tantiec tabadequi Nuquin Papa chiec onquedenepanëdash. ⁴³ Adec tabadcuededsho isash: —¡Padtembo! Dacuëdampambo iquec —quec utsibo tabadpanëdash. Adnubien Esusën ëbi chuibeneta caidon nadatiambocquin nabampanëdash. ⁴⁴ Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanëdash.

⁴⁵ Aton na menequin piucquid bedshun utsin na nibëdsho isun menepanëdash. ⁴⁶ Adecbidi badiadquidën-badiadquidënquiec Nuquin Papa tabadte shubu uashunaid yacno nidash iccuededpanëdash.

Adecbidi shubu utsi-utsiec yacno nidash iccuededquin Esus unësaid tantiaquin panëmpi cuësh-cuëshun peded-pededpanëdash. Adembidi bundoshon pebededoapanëdash. Adobanequi ëbi icsaid bedshunash Esus cuidadaid tantiec bëdambo iquebi, quec ⁴⁷ Nuquin Papan naid chiec cuëdëncuededpanëdash. Adec tabadsho isash, Bëdambocquido nec, quec utsibotsen Esus tantiaquid yanash abi tantiaquid utsitedibëd iccuededpanëdash.

3

Caputiapimbo icquid bëdamiaid

¹ Adnubien abi nidteniacadpënë ushë budec 3 yanuc Petedo Uambëd Nuquin Papa tabadte shubu uashunaid yacno Nuquin Papa chiec nidpanëdash. ² Ambo nidnubien caputiapimbocquid aid shubu shëcuë Bëdaidquio caid yacno utsibon buampanëdash. Anin tishacchobi yec caputiapimbocquid icpanëdash. Aidi badiadquidën-badiadquidënquien buandenequin aid shëcuë cuëmano nanded-nandedac uequimbi cho-chosho isun: —¿Adabi piucquid menetsia? —cabampanëdash. ³ Ambo Petedobëd Uan chosho isquin: —¿Adabi piucquid menetsia? —capanëdash caputiapimbocquidën uequin.

⁴ Adoaquien Uambëd niduntidash nidquin Petedon: —Ëbi daëdi is —capanëdash caputiapimbocquid bëisquin. ⁵ Adoaquien, Ëbi menepashun, quequin abi daëdi isobien, ⁶ Petedon: —Pucquid con na nibëdec. Ëmbi tanti-aidën ëbi tantiamebocpaden naimbique. Nasaded yacno iccondaidën Esusën bëdamiacpadec bëdanash nidtoash nidec nid —capanëdash. ⁷ Aden chuiquin caputiapimbocquidën mëdante abiucquio bedtanquin Petedon nidtomiac badedquio nidtopanëdash caputiapimbochoedi.

⁸ Bëdambo yec nidtoash capupanëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdamioshi, quec pudundotan-pudundotanec: —Cuishon —quepanëdash. ⁹ Adec capusho isquidon nadobededpanëdash: ¹⁰ —Nuquin Papa tabadte shubu uashunaid shëcuë, Bëdaidquio caid yacno uetsequi, Piucquid ëbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanëdash.

¹¹ Adec capuequi Petedobëdta Uan mëdinec Sadomonën tacpan quënë uabicquid yacno puduednubien iccuededquid tsibanash anotsen tantiadempambo yec tabadoapanëdash. ¹² Adec tabadsho isun Petedon naden chuibampanëdash: —¿Atotsi quiash padtec quequin ëbi daëdi comapenen bëise? ¿Ëbi daëdshun nacta nëid capupadic? ¿Ëbi bëdambocquid icquindambi nadio? Padenquio. Nuquin tsusedpabon Papa caidën bëdamiaid nec. ¹³ Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidëmbi ambi nidaidën chomiaid Esus nëbi aton Papabëd tabadoaic. Aton Papa yacno nidoabicscho Esus bedshun Pidato meniaquien, Nëid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unës uaquimbien ictiad, quequin mibitedishun chuipondac. ¹⁴ Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. ¹⁵ Abia uincuentequid mibi chuiquid dapa mimbi unës uacshobien Nuquin Papan aidi uincuemepondash. Aid uincuenacsho ëbitedishun isondambi. ¹⁶ Esusën ëbi bëdamepec, quequin tantiash nëid taë icsacboedën Esus tantiash capusho mibitedishun

isec.

¹⁷ “Utsibo, Nuquin Papan chomiaid nec, quequin tantienquiocquin mibi chuiquidobëdtan mimbi Esus unës uamiondac. ¹⁸ Ĕmbi matses chuiquid dapa icmenu caid matsesën mëyanaid iquendac, quequin ambi chuimi-aidtedi Nuquin Papan dada uamiampicpaden mimbi naondac. ¹⁹ Nëbi mimbi icsamboen tantiaid ënquin Nuquin Papa tantiata ma mibi icsaid bëpiscudpanuna; adecbidi ma abëdi tabadebi, quequin tantiec mibi bëdambo icpanuna; ²⁰ adecbidi ma ambi chuiquid dapa icmiaid Esus mibi bedmenuen chomepanuna. ²¹ Nuquin Papan abitedi icsaisa icmete ushë choabicnuc ambi chiampicpadequi nëbi Esus abuc aton Papabëd tabadec. ²² Adembidi chuiquin Moisesën dada uampid nad iqueque. Tantiata:

‘Chuiquid Dapa ëbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bëdamboen nabanta.

²³ Ambi chiaid tantiesa Nuquin Papan nësecaindac,’ quequin Moisesën dada uampic.

²⁴ “Adomboembidi Samuedën chuibampampic. Adomboembidi Nuquin Papan chuimiaid utsibon chuibanoampic. ²⁵ Nuquin Papan chuimiaidon tsyuecquido mibitedi nec. Tsusedpa Abadauanën tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ëndenquimbo unësampin aton matsesbëdta matses utsi-utsien min tsyuecquidën bëdambo icmendac.’ ²⁶ Nuquin Papan Abadauan chiampicpadec aton tsyuecquid choacsho mimbi unës uapondac. Aidi Nuquin Papan uincuemiatic ma isadaidbomba

abi icsaid ěnsho ma ambi bĕdambo icmiaid icpanuna —quepanĕdash Petedobĕd Uan.

4

Ambi naid Petedobĕdta Uan isadaidbo tsusiobon chuibami-aid

¹ Aden Petedobĕdta Uanĕn chuibanubien isadaidbo tsusiobo cho-chopanĕdash. Utsi-utsiec Nuquin Papa tabadte shubu uashunaid yacno cho-choquid bĕdamboen tabadmequidquio icnubi utsi-utsiec saduseyobo icpanĕdash. ² Esus unĕs uacsho Nuquin Papan uincuemiapadembi matsesetsen unĕsacsho uincuemeoaindac, quequin Esus chuibenequidon chuibanubi chopanĕdash aido. ³ Choshon Petedo Uambĕdta bedash: —Inchĕsheque. Badiadshun nĕidĕn chiaid tantianush nidnu. Nid —quianec puduanquimbi Petedobĕdta Uan quĕnĕn nauedmepanĕdash isadaidbo tsusiobon. ⁴ Aid daĕdi bedabicnuc Petedobĕdta Uanĕn chuibansho tantiaquido Esus tantiaquid dada dadpen sinco midted yampanĕdash.

⁵ Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoĕsh iccuededpanĕdash. ⁶ Nĕidtedi icpanĕdash: ancanquid dapa daĕd Anasbĕdi Caipas icpanĕdash. Nĕidic aton shubun icquido abipadquido: nĕidic Uan, utsi-bic Adecandedo, aidtedi cho-choash iccuededpanĕdash. ⁷ Iccuededshumbic Petedobĕdta Uan bĕmeshun nĕnantanquio nidtomeshun: —¿Tsutsi chuiquin caputiapimbocquid bĕdamio? —capanĕdash tsusiobon.

⁸ Adoaquien Petedo Nuquin Papan Mayanĕn comapenen tantiamiac nadpanĕdash: ⁹ —Caputiapimbocquid tantiaquin bĕdamiaid isec ¿mitsipaden nao, quecta mibitedi tabadpe? Ancanquidbĕdtabi chuiquid utsibo isadaidbo utsibo mibitedi chiambique. Tantiata.

¹⁰ Caputiapimbocquid Esuquidistu Nasaded yacno iccondaidën bédamiaið niosh. Mimbi unës uacsho Nuquin Papan uincuemiaiðen nac nëid caputiapimbochoedi nëbi nidtoash capusho mimbi isec. ¹¹ Aid bédamequid mimbi tantienquio yaid Nuquin Papa yacno yuedanquidquio nec. ¹² Nuquin Papa yacno yuedanquid utsi nibëdec. Nuquin Papa yacno tabadte bunec aid tantiaquid icta — quepanëdash Petedobëd Uan.

¹³ Adec Petedobëd Uan dacuëdenquio yec comapenec onquesho tantiasht tsusiobo: —Aid daëdi tsusiopenquio iquequi adecbidi Nuquin Papan chiampid tantiabenabicquid iquequi Esusbëd icquid aid daëd icquin ¿mitsipadomboen caputiapimbocquid bédamepashba? —quec tantiadempambo yec tsusiobo tabadpanëdash. ¹⁴ Aden ambi bédameboed aidbëdi icsho isash, Icsamboen mimbi naoc, quetiapimbo tsusiobo tabadpanëdash. ¹⁵ Adshun Petedo Uambëdta nidmiash, Tantanu, quec onquecuededec tsusiobo: ¹⁶ —¿Mitsipadomboen aid daëd nuqui napeba? Nadatiambocquin nasho Edusaden yacnocquidtedishun isbededposh. Ad icnuc, Caputiapimbocquid bédanambo iquec, ëbitedi quetiapimbo iquebi. ¹⁷ Dadpenshun tantianushe queshun, Esus padpiden chuibanoainda, quequin aid daëdi chuinuna — quecuededpanëdash tsusiobo. ¹⁸ Adshun Petedobëdta Uan chomeoashun: —Padpiden Esus chuibanoainda. Aidën chiaid chuiquin tantiamenda —capanëdash tsusiobon.

¹⁹ Adoaquien: —¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiacpaden nadi? ²⁰ Nuqui isboed nuqui tantiaboedbidi chuitequidquio iquendac —quepanëdash Petedo.

²¹⁻²² Adoaquien: —Ëmbi chiacpaden nainquiocsho isun mibi daëdi mëyantsiambique. Baded nid cueschitomane

—capanēdash tsusiobon. Abi tishaid seta 40ted icquid caputiapimbocsho bēdamepanēdash. Aid Nuquin Papan bēdamiacsho isash utsibo cuēdēncuededpanēdash. Adsho tantiash Petedobēdta Uan mēyantiadquioeboedi adotiapimbo yec tabadpanēdash tsusiobo.

Isadaidbo tsusiobon chiaid Esus tantiaquidon chuioaid Nuquin Papa chiaid

²³ Tsusiobon nidmiac nidash iccuededbocnombo choash puduedshun tsusiobon chuiboed Petedobēdtan Uanēn chuioapanēdash. ²⁴ Adoac abentsēc onquiacbimboen naden Nuquin Papa chuipanēdash:

—Con Icbombo mibi nec. Abubēdta nidaid acte chedo uashun aidēnquio icquidtedimbo mimbi uabampampic.

²⁵ Adembidi ēndenquimboshē mimbi tantiacpaden min Mayanēn tantiamiac mimbi chuimiaid, Dabid padon naden dada uapampic:

“¿Atotsieshumbini ēbi dēniactiapimbo icquidombi isadaidpembo comapenec nēishash ēbi dēniacte buncuededpec? Adquiecbidi ¿Atotsi quiash ēmbi chomiaid icsamboen nanushbimboec isadaidbo onqueuidoapec?

²⁶ Ancanquidobēd chuiquid utsibo ēmbi chomiaid aton Icbobi mēyanuec iccuededec.”

²⁷ Ai, mimbi Dabid pado dada uamiampicpadembi ēnabi Edusaden yacno isadaidpembo ancaquid daēd Edodesbēd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onquecuededpondash. ²⁸ Mimbi tantiampicpadembi unēs uapondash, Papa. ²⁹ Adquidēn Petedobēdta Uan chushcasha mimbi tantioc. Cuesambocquid ēbitedi icmequin mimbi chiaid ēbi chuibame, Papa. ³⁰ Icsaisan Esusēn bēdamiacpaden nadatiambocquin naban, Icbo —quepanēdash Esus tanti-aquido Nuquin Papa caic.

³¹ Adoac abi iccuededacno ishcadpanëdash. Adec ishcadnuc ambocquid Nuquin Papan Mayanën comapenen pausunac dacuëdenquiocquin Nuquin Papan chiaid chuibampanëdash.

Abentsëc yac bimboec tabadaid

³² Aden chuibanequi abentsëc onquiac bimboec tabadec Esus tantiaquido, Con na nec, quenquo yec, Nuquin Papan na nec, quec tabadcueneapanëdash.

³³ Adequi tabadcuenequimbi dacuëdenquiocquin, Esuquidistu uincuenacsho isombi, quequin chuibenapanëdash. Adec Esus tantiaquido tabadsho utsibon bëdamboen isbededquin aidën chuibansho bëdamboen tantiapanëdash. ³⁴⁻³⁵ Adembidi nidaid

icbo utsin-utsinquien aton nidaid menequin piucquid bedshun Esus chuibenequido menapanëdash. Adembidi, shubu icbo utsin-utsinquien aton shubu menequin piucquid bedshun meneoapanëdash. Aden meniac aton na nibëdquid icsho isun Esus chuibenequidon menebanac bunenquo tabadpanëdash. ³⁶ Adecbidi

ambo acte nënantanquo nidaid nacdëdquid shubu uaidënsun Chipide caid yacnoshon tishaid Edusaden yacno choash Ose tabadpanëdash. Aidi, Bëdamboen mimbi naoque. Adobanta, quedenesho Bednabe cuëmpanëdash. ³⁷ Aidëmbi aton nidaid menequin

piucquid ambi bedaidtedimbo Esus chuibenequido meneoapanëdash.

5

Ananiasbëd aton chido Sapida muaid

¹ Adnubien dada utsi Ananias cuëmëdquid aton chido Sapidabëdtan aton nidaid menequin piucquid bedpanëdash. ² Bedshun aton chidon isnubi musucbanshun ambi

musucaid utsi dayun uash Esus chuibenequido yacno nidshun abitedi meniacbimboen menepanēdash Ananiasēn. ³ Adnubien, Piucquid abitedi meniacbimboen Ananiasēn mua uaposh, quequin Nuquin Papan Mayanēn tantiamiac naden Petedon Ananias chuipanēdash: —Satanasēn tantiamiaid icquin ¿mitsipaden tantiaquin Nuquin Papan Mayanēn isnubi mua uaqin ēbi menio? ⁴ ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidtedi mitsana niosh. ¿Mitsipaden tantiaquin piucquid abitedi meniacbimboen meniano? Aden bēquin abimbo chienquiocquin Nuquin Papambobi mimbi mua uaboc ⁵ —Petedo qesho tantianec Ananias unēsequi uebudpanēdash. Adsho isash Esus tantiaquidtedi dacuēdpanēdash. ⁶ Unēsacsho isun dashcute cuēshēn dataneshun buanshun caniabon chococatampanēdash.

⁷ Bēnē chococambic ushē abuctoan unēsboedēn chido aton bēnē unēsaid tantienquio yec choapanēdash.

⁸ Choasho isumbien: —¿Ada min nidaid menequin nēidtedi piucquid bedo? —Petedo qesho tantiasien:

—Ai, aidtedi bedombi —quepanēdash Sapida.

⁹ Adoquien Petedo: —¿Nuquin Papan Mayanēn ēbi muasho tantiapec, quequin tantienquiocquinda min bēnēbēdtambi min piucquid abitedi meniacbimboen meniano? Nēbi min bēnē chococaboedon mibitsen buanendac —Petedo quenubic ¹⁰ Petedon tayumbi uebudec Sapida unēsapanēdash. Aidtsen unēsacsho buanshun aton bēnēbēdtabi chococatampanēdash. ¹¹ Adoac aid daēdi unēsaid tantias Esus tantiesatedi Esus tantiaquidobēd comapenec dacuēdcuededpanēdash.

Bē-bēaidtedi bēdanaid

¹² Adashic Sadomonën tacpan caid yacnoësh Esus tantiaquido iccuedednubi Esus chuibenequidon nadati-ambocquin nabampanëdash. ¹³ Adomboen nabansho isash Esus tantiesabo dacuëdec tacpan yacno choti-apimbo yequi: —Esus tantiaquido bédamboshë iquec —quecuededpanëdash. ¹⁴ Adec tabadequi utsi-utsiec dadpen dadabëdi chido Esus tantiaquido yampanëdash. ¹⁵ Adec Esus tantiaquid yanshun, Daicsaido Petedon bédamepec, quequin tantiaquin daicsaido bë-bëshun Pedito capuacno nambededpanëdash. ¹⁶ Adembidi dëuequidon Edusaden yacno daicsaid bë-bënubi mayan ic-san mëyanaido bë-bëoapanëdash. Aden bë-bëaidtedi bédampanëdash.

Esus chuibenequido tsusiobon quënën nauedmiaid

¹⁷ Adnubien isadaidbo ancaquidbëd tsusio dapa ut-sibo saduseyobo caid isec otacquo tabadboedi mat-ses dadpen Esus chuibenequido yacno cho-chosho isash nëishcuededpanëdash. ¹⁸ Adec nëishcuededshun Esus chuibenequido bedmeshun quënën nauedmepanëdash. ¹⁹ Aid inchëshëmbi Nuquin Papan uaid mayan bëda choshon quënë shëcuë bëtashaid bëcadoquin abitedi puduemec: ²⁰ —Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata —quepanëdash Nuquin Papan uaid mayan bëda.

²¹ Badiadnuc Nuquin Papa tabadte shubu uashunaidëd puduedshun Esus tantiaquid abi uincuentequid chuibanoaic tabadoapanëdash aidtedi. Chuibanubien isadaidbo tsusio dapan abëd icquidobëdtambi tsusio utsibotedi cho-chomeshun: —Esus chuibanquido bedtan —cac ²² quënën nauedaid puduenushe quequin isquido chuiquid nidshun isquien Esus chuibenequido

nibëdec. ²³ Adsho isash choaquin: —Quënë shëcuë bëdamboen bêtashquin quënën nauedaid puduenushe quequin isquido shëcuë cuëmano capusho isombi. Shëcuë bëcadoash puduedshun isaquien ënden puduen-puduenac —quepanëdash quënën nauedaid puduenushe quequin isquido chuiquid. ²⁴ Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec. ²⁵ Adnubien dada utsi choshon: —Mimbi quënën nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash. ²⁶ Adoaquien quënën nauedaid puduenushe quequin isquido chuiquid capitan caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi se-senushe qeshun mëyanenquiocquin Esus chuibenequido bëoapanëdash.

²⁷ Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: ²⁸ —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo. ²⁹ Adsho Esus chuibenequido ut-sibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi. ³⁰ Mimbi cuesten dectanquin unës uaondaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec. ³¹ Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tanti-aquid icpashun ma abi icsaid Nuquin Papa bëpiscudpanuna. ³² Esuquidistun nabansho isbempondambi. Adem-

bidi abi unēsash uincuenacsho ispondambi. Nuquin Papan Mayan icsaisan Esuquidistu tantiaquidobēd icquidēmbi adomboen ēbitedi tantiamēoaic —quepanēdash Petedo.

³³ Aden Petedon chuisho tantiash tsusiobo: —Icsambo iquec —quiash Esus chuibenequido cuesunete bumpanēdash. ³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamēquid utsibon bēdamboen isaid, Camadied cuēmēdquidēn: —Chiata. Bēboedtedi buantan —cac ³⁵ buanambic: —Icsamboen nanushe qeshun bēdamboen tantiaquiota. Aido cuesunete mibi buneque. Cuesunenushe chiata. ³⁶ Ēndenquio utsi Teyudas cuēmēdquid icpondash. Aidi tsusio dapa icnuequin chuisho tantiash dada dadpen 400ted abēdi capupanēdash. Teyudas cuesuniacsho isash abēd icboedtedi udi nidaniacsho padpiden isenquio icpanēdash. ³⁷ Adashien matses tambanta caid ushēmbi utsi Udas cuēmēdquid Cadidia yacno icnēdaidbēd matses dadpen capupanēdash. Udastsen cuesuniac abēd icnēdaidtedi padpidec choenquio yec adecbidi udimbo nidanepanēdash. ³⁸ Adec umanuc buamboedo chuiquid nibēdanaque. Aidbēd icboedo mishenda. Cuesunemenda. Aidēn chuibanaidbēdtabi ambi naid matsesēn naiduidt-sēqui icnuc badedquio ēnēdendac. ³⁹ Aido Nuquin Papan namiac chuisho mimbi ēmetiapimbo iquendac. Nuquin Papa chieshēnushe qeshun aido nidmeta.

⁴⁰ Aden Camadiedēn chiac: —Adonona —qeshun: —Buamboedo bēoata —cac bēacsho cueshcanten cuesmepanēdash. Aden cuestanquin: —Esus chuibanoainquio yec nidtan —qeshun puduemepanēdash. ⁴¹ Puduemiac Esus mēyanaid tantiec nidequi abi chuibansho mēyanaid yec bēdambo iquebi, quec tabadpanēdash. ⁴² Adshumbic badiadquidēn-badiadquidēnquien Nuquin Papa tabadte shubu uashunaid yacnoshon matses bēyucanquin chuiq-

uid, Nuquin Papan bēdamboen isaidquio Esus nec, quequin chuibampanēdash aidon. Shubu utsi-utsiec yacno nidshun adomboembidi chuibenepanēdash.

6

Niante chidobo pete menebanquid icta caid

¹ Adashic badiadquidēn-badiadquidēnquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanēdash. ² Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ēntiapimbo iquebique. ³ Niantebo meneta canuen nadquidquio istuidshun chuita. Nuquin Papan aton Mayan meniac tantiamiac bēdamboec tabadsho mimbi bēdamboen isaidquio istuidta. Adquid 7ted istuidshun, Niante chidobo pete menebanquid icta, cata. ⁴ Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

⁵ Adoaquien: —Mimbi bēdamboen chioc —quepanēdash Esuquidistu tantiaquid utsibo. Aidēn chuibocpadembi aidtedi istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquio Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. ⁶ Aidtedi istuidshun Esuquidistu tantiaquid utsibon aido bēdamboen isquin buanec Esus chuibenequido

yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiash Esuquidistu tantiaquido yampanēdash.

Esteban bedaid

⁸ Adnubien Nuquin Papan Mayan meniaidēnquo. ambi comapenen tantiamiaidēnquo, Estebanēn nadatiambocquin ismebampanēdash. ⁹ Aden nadatiambocquin ismenuc bēdamboen tantienquo yec utsibo comapenec onquecuededpanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidtedi Edusaden yacno chochoash tabadec Estebambēd comapenec onquepanēdash.

¹⁰ Comapenec onquequin Esteban Nuquin Papan aton Mayan meniaid icsho aidēn comapenen tantiamiac onquesho dēniaquec utsibo onquetiapimbo icpanēdash.

¹¹ Onquequin dēniactiapimbo icquin utsibo naden aidon chuipanēdash: —Tsusiobo naden chiec nidtan: Estebanēn nuquin tsusedpa Moises caidēn dada uampidbēdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash. ¹² Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash. ¹³ Ambo abi dēniactiapimbocquidon Esteban muaquin chuita caboedon naden chuibededpanē-

dash: —Nëid dada Nuquin Papa tabadte shubu uashunaidbēdta Nuquin Papan Moises dada uamepampid ënenquiocquin muaquin chuibanec. ¹⁴ Naden Estebanën chioshe. Tantia: Nasaded yacno iccondaidën, Esuquidistu caidën Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidën dada uampid naden nata quequin chiaid natiapimboctequid nec, quequin Estebanën chuibanosh, quequin muaquin chuipanēdash Esteban dēniactiapimbocquidon chomiaidon. ¹⁵ Aden Estebanën chiaid muaquin chuiquin naimbudquimbi tsusiobobēdtambi comapenen Esteban bëisquin Estebanën bētantiate ushëbimboec ushumbo yec chënquesho isbededpanēdash.

7

Estebanën chuibanaid

¹ Adec Estebanën bētantiate ushëbimboec chënquesho isec tsusio dapambo Esteban chuiquin: —¿Abimboda mimbi naid chuiposh? ² —caquien yuecquio onquequin Estebanën naden chuipanēdash: —Chiembique. Tanti-aquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uëshëmbo yec dasiuidteniaid matsesën istemaid bëchomaoanquiec icquid Abadauan ismepampic. ³ Aden ismec nadec onquepampic: “Min utsitedi nianec nidaid utsi yacno mibi ëmbi ismenu caid yacno nidta.” ⁴ Adsho tantiash Candeyabon nidaid yacnoësh nidashic nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic. ⁵ Aden chomeshun Nuquin Papan naden Abadauan chuipampic: “Nëid nidaidën mibi capuacno mitsanapenquio nec. Yuecshun mibi

menenun nanuna. Mimbi tishmiambocboedi min chidon tishaid abentsęc min madombo nęid nidaid menendambi. ⁶ Nęid nidaid bedabi yec mimbi tishmiaidęn tishmiaid caidaido matses utsibon nidaidęn tabadendac. Ambo tabadshobi anocquidęn aido yuashun seta dadpen 400ted matamequin męyanendac. ⁷ Adoacsho aidotsen cuidquin męyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi męyanacnoęsh nidashic nęid macuęsh yacno choshon ęmbi chiacpadomboen nabanendac.” ⁸ Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuębędta dada caniaidtedi shui dębid dętemeta. Adobansho isun, ęmbi chiaid będamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanęn ambia dętemeshun dadatedi aidęmbidi shui dębid dętemeoapampic. Adoshombic yuecquio icshun Abadauanęn aton mado tishmeshun Isac cuęnquin 7tedec ushun Isaquęn shui dębid dętemeoapampic. Adoshombic adem-bidi Isaquęn aton mado tishacsho Acobo cuęnquin aidtedecbidi ushun Isaquęntsen Acobon shui dębid dętemeoapampic. Adoshombic, canishun Acobon tishmi-aido 12ted icpampic. Abentse-abentsen tishmeshun aidtedecbidi ushun aton madon shui dębid dętemeoapampic. Adoquien yuecash Acobon madotedi tsusiobudnepampic —quepanędash Esteban isadaidbo tantiamenu quequin chiec.

⁹ Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaquio icsho isash nęishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoquin Equipito yacnocquid

Ose meneoapampic. ¹⁰ Adoac, Yuanu, qeshun nati-
 amiaid Ose icsho isun Nuquin Papan aid dayun uaqin
 dacuëdenquo icmequin comapenen tantiaquidquo bë-
 damboen chuiquidquo Ose Nuquin Papan icmepampic.
 Adquidquo icsho isun Equipito yacnocquido ancaquidën
 Padaon caidën Equipito yacnocquido chuiquidquo Ose
 icmepampic.

¹¹ “Yuecash Equipito yacnocquido chuiquid, Ose, ic-
 nubid nidaid Equipito caid yacnocquidbëd nidaid Canan
 caid yacnocquido natiambo buncuededpampic. Adnubi
 nidaid Canan yacno nuquin tsusedpabo Isadaidbon pete
 nibëdquiec yampampic. ¹² Adshumbic, Equipito yacno
 quënë uashun dayun uaid pete iquec, qesho tantiashun
 Osen papan Acobon ambi tishmiaido nuquin tsused-
 pabo chuiquin: ‘Equipito yacno pete iquec, qesho tan-
 tiombique. Bedtan,’ cac Osen utsibo aton papan chi-
 acpadec pete bedec nidanepampic. ¹³ Adanec Acobon
 madotedi aton utsibo Equipito yacno choacsho isun,
 Min utsi nebi, quequin chienquiocpampic Osen. Aton
 utsibon pete bedash abi yacno choashun ambi bed-
 tamboed naimëdsho isun, Padpidemboen bedoatan, cac
 nidash Equipito yacno choacsho, Min utsi nebi, ca-
 pampic Osen. Adoshon Equipito yacnocquido ancaquid
 Padaon yacno buanshun: ‘Con matses isadaidbo nec,’
 Ose qesho tantienquiochoedëmbi Padaonën tantiabem-
 pampic. ¹⁴ Aton utsibo Padaon chuibanshumbic Osen
 aton utsibo chuiquin: ‘Nuquin pabëdta nuquin matses
 bedtan,’ capampic. Adoac bedoanec Equipito yacno
 choapampic. Abëd icquido 75ted icpampic. ¹⁵ Adashic,
 Equipito yacno yuec tabadashi tsusio budashi Acobo
 unëspampic. Auëshquiobidi nuquin tsusedpabo Acobon
 madotedi adecbidi unësoapampic. Unësacsho Equipito
 yacno chococapampic. ¹⁶ Adashic, yuecquio yash Equipito

yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

¹⁷ Aden chuishumbic Estebanën nadopanëdash: — Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuipampid ushë chote anoentsëc yanuc nuquin tsusedpabo dadpen yanec caidpampic. ¹⁸ Dadpen caidsho isun Equipito yacnocquido ancaquid utsin Ose pado tantienquio icpampic. ¹⁹ Aidëmbi mua uaqin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. ²⁰ Adnubien dada bacuë Moises tishacsho Nuquin Papan, Aid bëdaidquio iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. ²¹ Ompoqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. ²² Bedsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

²³ “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiado con matses isnu, quianec aton matses chonoadacno nidquin Moisesën istuidpampic. ²⁴ Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuid-

nuequin Moisesën cuesuneoapampic. ²⁵ Ĕmbi adosho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquiec nidnubi aton matsesën tantienquio icpampic. ²⁶ Badiadash aton matses yacno padpidec nidquin aton matses daëd cuesnansho istuidshun, Ĕmenu, abibi quec choquimbi: ‘ĴAtotsi quec min matsesbëd cuesnane?’ Moisesën catuidpampic. ²⁷ Adoquien Moises cuëscatanec: ‘ĴĔmbi nasho cuidquin ëbi chuiquid tsuntsin mibi icmioshe? Chui. Tantuanu,’ que-tanequi: ²⁸ ‘ĴEquipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic. ²⁹ Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

³⁰ “Adashic, seta dadpen 40tedbidi matamec nidaid Madian caidën tabadec cuëtempiuidquio yacno matses nibëdqüiec yacno macuësh dapa Sinai caid anoentsëqui Moises chopampic. Ambobi tabadquimbi cuëtempi nëdënquiabimboecquid nënantanquio Nuquin Icbon Chomiaid tabadsho Moisesën ispampic. ³¹ Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuiampic: ³² ‘Min tsusedpa Abaduanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ qesho tantiash dacuëdec uëdëquec istiapimbo yec Moises nidtuidpampic. ³³ Nidtuidsho isec Nuquin Icho Moises chiec nadpampic: ‘Nëmbo ëbi icsapenquio icquid icnuc caputemaïd nidaid iqueque. Min tapucudte chic-

shun tantiata. ³⁴ Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,' quepampic Nuquin Icbo Moises chiec.

³⁵ “Aden cuëtampi nédënquiacbimboecquid nënantanquio icboedën Nuquin Papan Chomiaidën isadaidbo bëyucanquin buanquid icta cac: ‘¿Ëmbi naid icsho cuidquin ëbi chuiquid tsuntsin mibi icmioshe? Chui. Tantiyanu,’ abi caondaido bëyucanquin buanquid Moises icpampic. ³⁶ Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibédquiec yacno seta dadpen 40tedbidi matamec abi tabadcueniactnoshontsen nadatiambocquin nabanquin isadaidbo Moisesën ismeoapampic. ³⁷ Aidëmbi naden chuipampic: ‘Yuecquio icshun ëbipadquid mimbi tishmiaidën tishmiaidon caidaid Nuquin Papan chuiquidquio icmendac,’ quequin Moisesën chuipampic. ³⁸ Isadaidbo bëyucanquin chuiquid Moises matses nibédacno isadaidbobéd macuësh dapa Sinai caid yacno choash Nuquin Papan chomiaidobéd Moises tabadpampic. Ashunquio Nuquin Papan abëdi tabadte tantiamenuequin cuënote padapambocquidën ambi naden nata quequin dada uaid Moises menepampic. ³⁹ Aden aid dada uaid bedshun bëyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic. ⁴⁰ Adashic, Moises macuësh yacno yuecquio tabadnubi Moisesën utsimbo Adon cuëmédquid aton matses utsibon naden chuibededpampic: ‘¿Moises nuqui Equipito yacnoshon bëyucanquin bëboed mitsi nidpash

nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacentu. Nacnenash bëyucanquin chuiquid aid iquendac, tsusedpabon cac ⁴¹ bacan bacuëbimboecnuc Adonën nacnempampic. Ambi nacenaid tantiaquin isadaidbon nidaidën capuquid yua cuesuneshun cuëdënëmbededpampic. ⁴² Adquid cuëdënënsho tantiaquin isadaidbobëd ictiapimbo iquec Nuquin Papa, Padi. Adenda, quenquo icpampic. Adquido Nuquin Papan ëndenquimbo tantiaquin naden chuipampic: ‘Adomboen mimbi nacenaid tantiec tabad.’ Adembidi Nuquin Papan yuecquo icshun nanun chiaid isadaidbo chuiquin naden dada uamepampic:

‘¿Matses utsi nibëdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid tauidenio? Padenquo.

⁴³ Ëmbi uaid badiadën ushë, ëbitedishun bëyucamembi, qeshun aidpadquid nacnenshun Modoc cuënquin aton shubumpi nuntan namposh.

Aidbëdtabi uispa dapatsen ëbitedishun bëyucamembi, qeshun aidpadquidbidi nacnenshun Dempan cuë nec danëshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquo icquin nidaid utsi, Babidonia caid udi mibitedi nidmeoaindambi.’

Aden ambi chiaid niacquido isadaidbo tantienquo icquidobi Nuquin Papan chuipampic —quepanëdash Esteban isadaidbo chiec.

⁴⁴ Aden chiec yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic. ⁴⁵ Adashic, tsusedpabo aid

shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. ⁴⁶ Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimboquid shubu uashuntiadquiocquin shubu uate bë-bëmepampic. ⁴⁷ Aid shubu uabi Dabid unësambic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. ⁴⁸ Aden matsesën shubu uaidën Nuquin Papa tabadenquio iquec. Adembidi Nuquin Papan chuimianiaidën naden chuipampic:

⁴⁹ “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac?

⁵⁰ ¿Tauaquoquimbi abitedi uambodambi ictionda?”

quequin Nuquin Papan chuimiaidën dada uapampic —quequin chiashic Esteban abi onquec: ⁵¹ — Pacuënëdabimboen Nuquin Papan chiaid tantiaish icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic. ⁵² ¿Nuquin Papan ambi yuecquio icshun naden nanuna quequin chiaid ambi chuimiaidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës

uamiondac. ⁵³ Nuquin Papan chiaid ambi uaidon mayan bédabon meniaqui Nuquin Papa chieshênquido mibi nec —quepanédash Esteban isadaidbo chuiquin ênec.

Esteban se-siaid

⁵⁴ Adec Esteban onquesho tantiashun nëishênshun Esteban iccuededquidon chushcapanédash. ⁵⁵ Adoaquien Nuquin Papan Mayan meniaidquio icquin Estebanên abuc isquin Nuquin Papa uëshêmbo yec matsesên istiapimbo bêchomaoanquiec ictequid abichobi dasiuidteniaid chênquenubi Nuquin Papabéd tancandaédquiec Esuquidistu nidtuidsho ispanédash. ⁵⁶ Aden isequi: —Abuc shêcuë uaid shêcniaye. Is. Umbo Esuquidistu, matsesondaid, Nuquin Papabéd tancandaédquiec tsadsho isembi —quepanédash Esteban.

⁵⁷ Adsho tantiash tsusiobo comapenec sidquianec pamumédanec titinquequin Esteban bedshun ⁵⁸ cuënoten se-senuen shubu nibédacno udi buampanédash. Aden Esteban buanshun aton dashcute Saudo cuëmédquidên taêno sampanédash Esteban se-senuequidon. ⁵⁹ Sanshun se-siaquic Estebanên Esuquidistu cuênquin naden chuipanédash: —Ëbi yued, Icbo —quiashic, ⁶⁰ danêshên sebudash comapenec nader onquec: —Ëbi se-sequido icsaid cuidenquio yec bépiscudta, Icbo —quepanédash. Adec onquetanec Esteban unêspanédash.

8

Saudon Esus tantiaquido mëyanaid

¹ Esteban se-senu caquien, Ai, adota, quiash isec uano Saudo tsadpanédash. Esteban se-siaid ushêmbo Edusaden yacnoshon Saudon Esus tantiaquid utsi-utsien comapenen mëyanquin tauadopanédash. Adosho isash Esus chuibenequido ambobi tabadnubien Esus tantiaquid

utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanēdash. ² Adnubien Nuquin Papan chiacpadomboen naquin Esteban chococaic comapenec sedenquec shubipanēdash. ³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabēdtabi chido chedo bedmeshun quēnēn nauedmepanēdash.

Samadia yacnoshon Esus chuibanaid

⁴ Adashic Edusaden yacnoēsh nidanec shubu dadpen icquid utsi-utsiec yacno choshon abi tantiaquidon Esus chuibenepanēdash. ⁵ Adembidi niante chidobo aton na nibēdsho menequid, Uedipe cuēmēdquid nidaid Samadia caid yacno choshon adembidi Esus chuibanoapanēdash. ⁶ Aidēn nadatiambocquin nabanquin Esus chuibansho ambocquido iccuededquin bēdamboen tantiapanēdash. ⁷ Aidēmbi nadatiambocquin nabanac mayan icsa dapuduedaid icboedi mayan icsa sidquianec cuempanēdash. Adecbidi canite icsaidbēdta caputiapimbocquid dadpen bēdampanēdash. ⁸ Adsho isash Samadia yacnocquido, Bēdambo iquebi, quec tabadpanēdash.

⁹ Adnubien Samadia yacno ēnden chonaid, Nadatiambocquin nabanquid dapa nebi, quequin mayan icsan tantiamiacpaden Simon cuēmēdquidēn nabampanēdash. ¹⁰ Adosho isash: “¡Eee! Abimboshenda caposh. Nēid dada Nuquin Papan ambi nadatiambocquin nabante tantiamiaid nec,” quequin anocquidobēdtan abi chuiquidon comapenen tantiapanēdash. ¹¹ Aden yuen Simonēn ismiac, Isnuequid dadpen badiadquidēn badiadquidēnquiec abi yacno choash iccuededpanēdash. ¹² Adnubien, Nuquin Papa yacno puduedmianquid Esus

nec, quequin Uedipen chuibansho tantiaquid yampanëdash dadabëdi chido chedo. Adsho aittedi acten mentomepanëdash. ¹³ Simontsen: —Esus tantiaquid nebi —quesho acten mentoaqui Simon Uedipebëd capuquimbi Uedipen nadatiambocquin nabansho isun, Adopeshenda nabanec, quequin ispanëdash Simonën.

¹⁴ Adashic yuecash Samadia yacnocquido Edusaden yacno nidash nadpanëdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmepanëdash. ¹⁵⁻¹⁶ Adec aid daëd nidaneshun: —Esus tantiaquid acten mentoaidoudi nëidtedi nec —anocquido quesho tantiashun: —Nëidtedi min Mayan mene, Papa —quec onquequin ¹⁷ Petedobëdta Uanën mëdanten Esus tantiaquido mamishbampanëdash. Aden mamishbanubi aittedi Nuquin Papan aton Mayan menepanëdash.

¹⁸ Aden Petedon nasho isash Simon: —Ma adquiec mëquiadneshun mibi piucquid menenu. ¹⁹ Mimbi mat-ses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

²⁰ Adoaquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu.

²¹ Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. ²² Mimbi icsamboen tantiaid ënta. Aden icsaid ënsho isash Nuquin Papa mibi icsaid bëpiscudendac. ²³ Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

²⁴ Adoaquien: —Ëbi tauiantiadpambo chian anëdën-quequid nënenushe quiash mibi Uambëd Nuquin Papa chiec bëdamboec onquebudneta —quepanëdash Simon.

²⁵ Adec Samadia yacno tabadquin Petedobëdtan Uanën: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuioapanëdash aidëmbidi.

Uedipe Etiopia caid yacnocquidbëd icaid

²⁶ Adoshombic, Samadia yacno Uedipe icsho Nuquin Papan uaid mayan bëdan nadopanëdash: —Nëuëshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibëdacno podquedën nidash nidduidtanec chotan.

²⁷ Adoac nidtoanec nidquimbi Nuquin Papan uaidën mayan bëdan chuibocno choquin Etiopia caid yacnoësh choquid Uedipen bëquedtuidpanëdash. Ancanquid chido Candase cuëmëdquid aton na dayun uashunquid aid dada nepanëdash. Aidi Edusaden yacno nidash tabadquin Nuquin Papa chianec ²⁸ padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash. ²⁹ Adnubien Nuquin Papan Mayanën: —Nidaid cano chinunta —cac ³⁰ Uedipen titinquequin chinumpanëdash.

Aden Etiopia yacnoësh choquid dada uaid isec onquesho isash: —¿Isbanec onquequina tantiaquie? —quepanëdash Uedipe.

³¹ Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsadtopanëdash.

³² Aidbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio
yacpadec abi unës uanuequid icnuc cuëdenquio
icoaposh Nuquin Papan Chomiaid.

³³ Aidi Icsaisa icsho mëyansho isec, Icsambocquidta
neque. Isnu, quenquiocposh aton matses.

Aidi chido inesa yec ambi tishmiaid nibëdnuc ¿Tsuntsin
ambi naid chuipadic?”

³⁴ Aidedtedsëqui abi isec onqueboed Uedipe ismeshun
Etiopia yacnoësh choquidën: —Ëbi isec onqueboed ¿mit-
sicquid chiequini onquepo? ¿Abibi chiadaidtabi isec
onquepo? ¿Utsida chuibaneque? Ëbi chui. Tan-
tianu —capanëdash Etiopia yacnoësh choquidën Uedipe
chuiquin.

³⁵ Adoaquien, Matsestedi icsaid bedshunash abided
cuidadec Esus unësaid Nuquin Papa yacno puduedmi-
anquid nec, quequin dada uapampidën chiec, quequin
Etiopia yacnoësh choquid tantiamenuen chuibampanë-
dash Uedipen.

³⁶ Adoanec nidquimbi Etiopia yacnoësh choquid Esus
tantiaquid yanshun actempi istuidshun: —Actempi
iqueque. Is. ¿Adabi mentoe? —capanëdash.

³⁷ Adoaquien Uedipe: —Esus tantiaquidquio nebi,
quesho mibi acten mentono —capanëdash.

Adoaquien: —Nuquin Papan mado Esuquidistu nec,
quequin aid tantiaquid nebi —queshun Etiopia yac-
noësh choquidën: ³⁸ —Nidtuid —cac nidaid cano nidme-
quidën cabayo nidtuidmian acte budshun Etiopia yac-
noësh choquid Uedipen mentopanëdash. ³⁹ Adashic, acte
nantanuësh abi daëdi dectatosho Nuquin Papan Mayanën
Uedipe buampanëdash. Adoac Uedipe padpiden isenquio
yequi, Esus tantiec bëdambo iquebi, quec Etiopia yacno
nidoapanëdash.

⁴⁰ Adnubien Uedipe Nuquin Papan Mayanën nidaid utsi Asoto caid yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caid yacnotsen choapanëdash.

9

Saudon tantiate paucaid

¹ Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaidbo chuiquid dapabo yacno Saudo choash ² shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanëdash Saudon.

³ Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. ⁴ Aden dëcatiac Saudo paëdash uesho isun nadec abucuësh onquec: — Saudo, ¿atotsieshun ëbi tantiaquido mimbi mëyanpeba? Èbitsen mëyantiadpambocquin mimbi aido mëyanec — quepanëdash.

⁵ Adoquien: —Icbo, ¿Tsutsi mibi ne?

⁶ Adoquien: —Mimbi mëyanaid Esus nebi. Èmbi chiaid chieshë nec mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuimembique. Nidtan.

⁷ Adec abucuësh onquenubi Saudoböd cho-choquido nitudishun tantiequi onquequid isenquio yec tabadtu-idpanëdash. ⁸ Onquec ënëdan nidtoash Saudo istiadquio iquequi bëshupanëdash. Adsho isun mëdinanquin Damasco yacno buampanëdash. ⁹ Adequi Damasco yacno choash 3tedec ushec isenquio yec buna mëmunquiec Saudo tsadpanëdash.

¹⁰ Adashic, Saudo puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuinu. Tantia —caquien:

—¿Atoda? Nëbi uebi, Icbo —quepanëdash Ananias.

¹¹ Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudo cuëmëdquid Nuquin Papa chiec onquec tsadsho mimbi istuidendac. ¹² Adec aid ushac bimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

¹³ Adoaquien: —Con matses dadpeshun Saudon naid icsa chuibansho tantiombi, Icbo. Aidëmbi Edusaden yacnoshon mibi tantiaquido mëyamepac caoshe. ¹⁴ Aidbidi Edusaden yacnocquido chuiquid dapanquio dada uaid sananquin nëmbotsen mibi tantiaquido bedmeshun tane-menuec aidi chopac caosh —quepanëdash Ananias Esus chiec.

¹⁵ Adoaquien: —Aidi ëbi chuibeneta caidquio icmeshun ëmbi bëdamboen isaid neque. Aid dacuëdënenquio yec nidshun istanta. Aidën isadaidbo abi chuiquidobëdta isadaidpembo abi chuiquidobëdtabidi ëbi chuiben-chuibenec capuendac. ¹⁶ Ëbi chuibenesho mibi mëyantequid iquendac, quequin Saudo tantiamembi —quepanëdash Esus.

¹⁷ Adsho tantianec Ananias nidash Udasën shubun puduedshun Saudo mamishec: —Con utsi, mibi podquedën chosho chuiquidën Nuquin Icbonquio, Esusën mibi padpiden ismenuen Nuquin Papan Mayan mibi menenuembidi chomiaid nebi —quepanëdash Ananias Saudo chiec.

¹⁸ Aden Ananiasën chuinubi nuëcquid bitsibimboecquid ëshënuësh paëdnubi bëshuacboedëmbi, Saudon, bëdamboen ispanëdash. Aden isec capusho isun acten mentopanëdash. ¹⁹ Adecbidi Saudo penquio yec padishacboedi piash padpidec uidëncuenoapanëdash.

Damasco yacnoshon Saudon Esus chiaid

²⁰ Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuiapanëdash Saudon.

²¹ Aden chuisho tantiashtantiadempambo yec tabadec: —¿Edusaden yacnoshon Esus tantiaquido mëyameboe-dida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? —quepanëdash Damasco yacnocquido.

²² Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuidedchuidedpanëdash.

Isadaidbo Esus tantiesa abi cuesunete bunsho isash Saudo cuenaid

²³ Adembidi yuec ushquin Saudon ënenquiocquin chuibansho tantiashtantiadempambo yec tabadec: —¿Edusaden yacnoshon Esus tantiaquido mëyameboe-dida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? —quepanëdash Damasco yacnocquido. ²⁴ Adnubien Saudo

cuesunenuen shubu dadpen icquid abichobi tsicatequin daquënë uaidën shëcuë cuëmanoshon abi chieshënquidon caimpanëdash Saudo puduensho bednu quequin. ²⁵ Aden cainsho isun Saudo cuesunenushe qeshun chiac inchëshëmbi onquenquiocquin tsitsan dapan Saudo antsaduntanquin tsicatiaid quënë cachoc Saudo budmepanëdash.

²⁶ Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaqin ëbi bednushe quiash dacuëdcuededpanëdash aido.

²⁷ Adnubien, Saudobëd Esus tantiaquid utsitedi yacno choshon Bednaben yuedpanëdash. Aden yuedshun: —Saudon Damasco yacno nidquin Nuquin Icbo ispac caosh. Nuquin Icbo Saudobëd onquepac caosh. Adanec Damasco yacno choshon dacuëdenquiocquin Esus chuibampac caosh, quequin Saudon naid Bednaben chuibanpanëdash.

²⁸ Aden Bednaben chuibanac Esus tantiaquido Saudo dacuëdenquiocnobi aidobëdi capuquin Saudon anoshombidi Esus chuibanoapanëdash.

²⁹ Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuquin aidontsen cainoapanëdash.

³⁰ Aden Saudo cuesunenuen, cainec qesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsëqui nidmepanëdash.

³¹ Adashic Saudo nidmian cuesunenushe quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquio yec tabadpanëdash. Adec tabadquin, Nuquin Papan chiaid tantiabenu, qesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho

tantiesa icboedi Esus tantiaquid dadpenquio yampanëdash.

Petedon Ananias Dodcastsen bëdamaïd

³² Adnubien, utsi-utsien isbidanec nidequi Dida caïd yacnotsen Esus tantiaquid utsibo isec Petedo nidoapanëdash. ³³ Ambo choshon dada, Eneyas cuëmëdquid, seta dadpen 8ted matamec canite tsasiaïd Petedon istuidshun: ³⁴ —Esusën mibi bëdamaïque. Nidtoшон min uete buanun nacentata, Eneyas —Petedon cac Eneyas badedquio nidtoash capupanëdash. ³⁵ Eneyas capusho isash Dida yacnocquidobëdi nidaïd Sadon caïd yacnocquido Esus tantiaquid yampanëdash.

³⁶ Adnubien Dida uditsëc shubu dadpen icquid Ope caïd yacnocquid, Esus tantiaquid utsi, chïdo, Tabita cuënshumbi quïdiecon onqueten Dodcas cain cuënaïd tabadpanëdash. Aïdi bëdambocquid icquin badiadquïdën badiadquïdënquien pete nibëdquido menedenepanëdash. Adembïdi aton na nibëdquido Dodcasën menedenepanëdash. ³⁷ Aïdi Petedo Dida yacno icnubi icsabudec unëso isun abëd icquïdon dapanshun shubu abuc quënë icquïdën nampanëdash. ³⁸ Aden nanshun, Petedo Dida yacno tabadec, qesho tantiashun aïd chomenuëquin dada daëd Petedo tabadacno nidmiac aïd daëdi Petedo tabadacno choshon Dodcas unësboed chuïshun: —Nïdtuidenquio yec badedquio ëbëdi cho —cac ³⁹ abëdi badedquio Ope yacno Petedo nidpanëdash. Adec nïdec Ope yacno chosho isun abuc quënë icquïdën puduedmëpanëdash. Ambo puduedsho isun shubiquïmbi niantëbon Dodcasën tuscaboed dashcute dadpen Petedo ismëpanëdash.

⁴⁰ Adosho isun abïtedi puduemiash danëshën sebudash Nuquin Papa chïec onquetanec nïdtoshon unësboed isquin: —Nïdto, Dodcas —Petedon cac uïncuënequi

Petedo isec Dodcas badedi uëtsëdtopanëdash.
⁴¹ Uëtsëdtoşo isun mëdinquin nidtomesun
 niantebobëdta Esus tantiaquid utsibo cuënquin cho-
 chomeshun uincuemboed ismepanëdash. ⁴² Aden
 Dodcas ismesho isash aton shubuno nidanequin
 Dodcas uincuenaid chiac Ope yacnocquido dadpen
 Esus tantiaquid yampanëdash. ⁴³ Adnubien Petedo Ope
 yacnocquid nidaidën capuquid bitsi uashun chodcashun
 nacnenquid Simombëd yuec Petedo tabadpanëdash.

10

Petedo Codnedion chomiaid

¹ Adnubien shubu dadpen icquid Sesadeya caid yacno
 Codnedio cuëmëdquid isadaidpembo nidaid Itadia caid
 yacnoësh Sesadeya caid yacno choash tabadpanëdash.
 Aidi sondado dadpen 100tedi chuiquid icpanëdash. ² Aidi
 aton shubun icquidobëdi Nuquin Papa tantiaquid icquin
 isadaidbo aton na nibëdquid icsho isun menebanquid
 icpanëdash. Adecbidi Nuquin Papa chiec onquiane-
 denepanëdash. ³ Adquid yec ushë budtsambi tedes
 yanuc Nuquin Papa chiec onquequimbi ushacbimboec-
 quin Nuquin Papan uaid mayan bëda Codnedion ispanë-
 dash. Nuquin Papan uaid mayan bëda choshon: —
 Codnedio —capanëdash.

⁴ Adsho tantiash dacuëdquin comapenen isec: —
 ¿Atotsibi name, Ico? —quepanëdash Codnedio.

Adoaquien: —Abi chiec mibi onquedenesho Nuquin
 Papan tantiec. Adembidi aton na nibëdquid tantiaquin
 menedenequid mibi icsho Nuquin Papan bëdamboen
 isaid mibi neque. Chuinu. Tantiata. ⁵ Nëbi Simon
 cuënshumbic Petedo cuënoaid ma bednu mimbi namiaido
 Ope yacno nidmetan. ⁶ Simon utsi nidaidën capuquid
 bitsi uashun chodcashun nacnenquidbëd tabadec. Aidën

shubu acte cuëmambi iquec —quepanëdash Nuquin Papan uaid mayan bëda Codnedio chiec.

⁷ Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun ⁸ Nuquin Papan uaid mayan bëdan chuibocpaden Petedo bedmenuen ambi namiaido Codnedion nidmepanëdash.

Petedon ushacimboec tsadquin isaid

⁹ Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuec shubu macano pada-padapambocquid yacno dectatopanëdash. ¹⁰ Adec dectatoash shubu icbon codocanubi Petedo bundoec ushacimboec tsadquimbic ¹¹ abu posonianec abi yacmi dabidiete dapabiequid bucun dënëshbudcuenaid budsho Petedon ispanëdash. ¹² Aidënquio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash. ¹³ Adnubien: —Nidtoson cuesuneshun pe, Petedo —capanëdash abucuësh onquequin.

¹⁴ Adoaquien: —¿Abida cai? Ëmbi petemaid tauishun mibi shëdmetemaidquio antabëdquid nec. Adquid piamboccombi, Icbo —quepanëdash Petedo.

¹⁵ Adoaquien padpidec abucuësh onquec: —Nuquin Papan bëdambo icmiaid icsambo iquec cainda —quepanëdash. ¹⁶ Adotanquimbic antabëdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquio buanshun puduedmeoapanëdash.

¹⁷ Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmano choec nidtuidpanëdash. ¹⁸ Choec nidtuidash: —¿Nëmboda Simon Petedo tabadec? —quetuidpanëdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. ²⁰ Ĕmbi chomiaido neque. Budash cacuidenquoio yec aidobëdi nidtan —capanëdash.

²¹ Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

²² Adoaquien: —Codnedio cuëmëdquidën chomiaid nebi. Aidi sondado dadpen chuiquid bëdamboquidquoio nec. Adquid icquin Nuquin Papan chiacpaden nabansho isun isadaidbon bëdamboen isaidquoio nec. Aidi Nuquin Papan chomiaid mayan bëdan naden chuipac caosh. “Simon cuënshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioposh —quepanëdash Codnedion chomiaido Petedo chiec.

²³ Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnoquid utsin-utsinquien tsibanampanëdash. ²⁴ Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantiashun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash. ²⁵ Aden iccuededmiac tabadnubi utsibobëd choec Petedo chedo puduedsho isash, Mibi bëdamboquid icnubi adesa nebi, quequin Petedo ismec danëshën sebudec shuebudash Petedo bëisenquoio yec Codnedio uepanëdash.

²⁶ Adec uesho isash Petedo: —Mibipadquid nebique. Nid tota —quepanëdash Codnedio caic.

²⁷ Adtanec Codnediobëd onquetanec quënë utsin puduedshun isadaidpembe dadpen Petedon

istuidpanëdash. ²⁸ Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac ²⁹ mimbi ëbi bedmiaido choacsho isash, Mibëd capuesa nebi, quenquoio yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquoio yec puduedobi. Nëbi Tiantianu. Chui. ¿Atotsieshun ëbi chomio? —quepanëdash Petedo Codnedio chiec.

³⁰ Adoaquien Codnedio: —Abentsëc choec ushanec ushë budec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bedbedquiabimboec dasiuidquid ëbi yacmi Nuquin Papan budmiac onquec: ³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquoio icquin tantiec. ³² Nuquin Papa bëdamboen tantianuen Simon cashumbic Petedo caid Ope yacnocquidbëd tabadquid ma chono qeshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda onqueposh. ³³ Aden chiac: “Petedo bedtan,” quequin ëmbi namiaido nidmiombi. Adoac bëdambocquid yec cacuidanenquoio yec badedquoio mibi choc. Ade mibi choacsho isash bëdambo iquebi. Nuquin Papan nuqui isnubi ambi mibi tantiamiacpaden chuibanasho tantiec tabadnuna —quepanëdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiemi. ³⁵ Nuquin Papan chiaid tantiashun matses utsin-utsinquier chieshēnenquiocquin bēdamboen nabansho isun, Aidedi Nuquin Papan abi yacno yuedendac, quequin tantiemi. ³⁶ Ēdenquimboshē Nuquin Papan dada uamequin con tsusedpabo isadaidbon tishmiado caidaido naden chuiampic: Esuquidistu abentsēqui matsestedi chuiquid icnubi utsibēd bēdamboec tabadendac. ³⁷ Nidaid Cadidia yacnoshon Uan padon chuibanquin acten mentoquier Esuquidistun ambi naid tauapondash. Mibitedishun aid tantiondac. ³⁸ Ma abēd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bēdamboen nabanquin abi chieshēnquidēn Satanas caidēn mēyanaido Esuquidistun bēdamebampondash. Adosho mibitedishun isbampondac. ³⁹ Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unēs uaqi ⁴⁰ uincuenash, Uincuenobi, quequin Esuquidistun ismebempondashi. ⁴¹ Aidi uincuenshun matsestedi ismenquiocquin aibēdtan peshun acquidotedictsēqui Esuquidistun ismepondashi. ⁴² Abēdi icshobi, Ēbi chuibanquin matses icsaid cuidte chuibante ushē choec quequin chui, cac nebi. ⁴³ Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ēnsho isash

abi icsaid Nuquin Papa bëpiscudendac. Esuquidistu chuiquin aden dada uapampic —quepanëdash Petedo Codnedion shubun iccuededquido tantiaequin chiec.

Isadaidpembo Nuquin Papan aton Mayan meniaid

⁴⁴ Aden Petedon chuibanshobi abitedi tantiaquid icsho isun Nuquin Papan ma abëd tabadnueshun aton Mayan menepanëdash. ⁴⁵⁻⁴⁶ Aden meniac isadaidpembo nëbi Esuquidistu tantiaquido yanshun abi onquiacmaidënquio utsin onqueten onquequin Nuquin Papa chiec cuëdëmpanëdash. Adsho tantiash Petedobëd cho-choboedo isadaidbo aton tsusedpabon nacpaden shui dëbid dëtemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanëdash isadaidbo Petedobëd cho-choboedo.

⁴⁷ Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? ⁴⁸ Aid, acten mentometa —capanëdash Petedon.

Aden acten mentoauqi: —Nuquibi tabadnuna —cac Petedobëd cho-choboedo acten mentoaidobëd daëdpactsëc ushec tabadpanëdash.

11

Isadaidbo Petedon ambi naid chiaid

¹ Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bëdamboen tantiash Esuquidistu tantiaquido yanosh, quequin chuipanëdash. Anoshon chuibëtsenec Edu-saden yacnotsen choshon adomboembidi chuioapanëdash. ² Aden chuisho anocquidon Esuquidistu tantiaquid utsibon tantiash tsusedpabon chiacpadomboen shui dëbid dëtemequido yec Petedo nëmbo choacsho isun,

Aidi ambi nabanaid chuimenu, quequin caimpanēdash. Aden cainubic Petedo choacsho isash³ comapenec onquecuedec: —Isadaidpembo shui dēbid dētemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tantuanu —quepanēdash Edusaden yacno tabadquido.

⁴ Adoaquien Petedon nadopanēdash: —Aidobēd ēbi tabadboed chuibanu. Tantiata. ⁵ Ope yacnoēsh Nuquin Papa chiec onquequin ushacbimboen naden ispombi. Abuc posonianec ēbi yacmi dabidiete dapabiecquid dēnēshbudcuenaid budposh. ⁶ Aidēnquio nidaidēn capuquid tacbidēn capuquidbēd podochoquid chedo antabēdsho ispombi. Aidēn antabēdquid nuqui petequidbēd nuqui petemaid icposh. ⁷ Adquid icsho isnubi: ‘Nidtosshon cuesuneshun pe,’ caposhi. ⁸ Adsho tantiashun: ‘Aidtedi ēmbi petemaid tauiquin mibi shēdmetemaidquio nec. Adquid pesambo nebi, Icho,’ capombi. ⁹ Adoaquien abucuēsh padpidec onquequin: ‘Nuquin Papan bēdambo icmiaid icsambo iquec cainda,’ caposhi. ¹⁰ Adomboembidi abentsēc chotsēcncuc tabēcaido abuc buanshun padpiden budmeshun adembidi chuishun buanshun abitedi abuc puduedmeoaposh. ¹¹ Abuc buanoabombic dada abentsēc chotsec Sesadeya caid yacnoēsh choquido shubu shēcuē cuēmano nidtuidash nidpac caosh. ¹² Aidtedi icnubi Nuquin Papan Mayan: ‘Aidobēdi cacuidenquio yec nidtan,’ qesho tantiash aidobēdi nidpobi. Aidobēd Ope yacnocquido dada 6ted Esuquidistu tantiaquido puduanec nidec Codnedion shubun ēbēdi puduedposh. ¹³ Puduedacsho isash Codnedio: ‘Nuquin Papan chomiaidēn ambi uaid mayan bēdan naden chuiposhi: Simon cuēnshumbic

Petedo caid Ope yacno tabadeque. Aid bedmuenen mimbi namiaido nidmeta. ¹⁴ Aidëmbi mibëd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bëdan chuiposhi, quequin Codnedion chuioaposhi.

¹⁵ “Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. ¹⁶ Aden meniacsho isun Nuquin Icbo Esuquidistun chiondaid ëmbembi tantiatsëcquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icbo Esuquidistun. ¹⁷ ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanëdash Petedo shui dëbid dëtemequid utsibo chiec.

¹⁸ Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abëd icquid icmeoapac —quepanëdash Nuquin Papan naid chiec.

Antioquiya yacnoshomba Esus tantiaquido iccuededaid

¹⁹ Esteban cuënoten seshuniash: “Esuquidistu tantiaquido cunesunenu,” quesho tantiash ëbitsen cunesunenushe quianec Edusaden caid yacnoësh Esuquidistu tantiaquid utsi-utsiec nidanepanëdash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nactnëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidbouidi Esuquidistu chuibampanëdash. ²⁰ Adshumbic,

utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpembo Esuquidistu tantiamenuen chuibampanëdash. ²¹ Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Ëbi icsaid ënu, quequin ënash Esuquidistu tantiaquid dadpen yampanëdash.

²² Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsi-bon Edusaden yacnocquidon Antioquiya yacno Bednabe nidmepanëdash. ²³ Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantiata —quepanëdash Bednabe. ²⁴ Bednabe bëdambocquid icsho Nuquin Papan aton Mayan meniac Esuquidistu bëdamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanëdash.

²⁵ Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon ²⁶ Saudo istuidash Antioquiya yacno aibëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpanëdash.

²⁷ Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan

yuecquio icshun nanun chiaid chuiquido cho-chopanédash. ²⁸ Cho-choshon abentsëqui Accabo cuëmédquid Nuquin Papan Mayanën oncamiac: — Yuec-yuecpactsëc yash nidaidtedi yacnocquidon pete nibédendac —quepanédash. Aden chiambic shubu dadpenquioshë icquid Doma yacnocquido ancaquid Quëdaudio cuëmédquid icnubi pete nibédquiec yampanédash. ²⁹ Adnubic, Udeya yacnocquidon pete nibédec, qesho tantiaishun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanédash. ³⁰ Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebédta Saudu menequin Edusaden yacno buamepanédash Antioquiya yacno tabadquin Esus tantiaquidon.

12

Acobo cuesuniaidbédta Petedo quënën nauedaid Nuquin Papan puduemiaid

¹ Adnubien Edusaden caid yacno tabadquid domanobo ancaquid Edodes cuëmédquidëmbi Esuquidistu tantiec iccuededquido utsi-utsien comapenen mëyanuequin bedmeshun quënën nauedmepanédash. ² Aido quënën nauedmeshun Esuquidistun ëbi chuibeneta caid abéd capucueboed Acobo cuëmédquid chështen cuesunemepanédash. Acobon utsimbo Esuquidistun ëbi chuibeneta caid abéd capucueboed utsi Uan nepanédash. ³ Adoac, Acobo cuesuniosh, qesho tantiaish isadaidbo utsibo, Esuquidistu tantiesabo: —Bëdamboen Edodesën naosh —quepanédash aido. Adec onqesho tantiaish Edodes: Isadaidbon pan bidisquesa tantiaid

ushë choec, quequin Esuquidistun ëbi chuibeneta caid utsi, Petedo cuëmëdquid, bedmeshun quënën nauedmepanëdash. ⁴ Aden quënën nauedmeshun Petedo cuenushe queshun sondado 4ted quënë nuntan tabadmeshun pan nami uambocquid petequid tantiaid ushëtedi naimëdambi ambi naid icsa Petedo chuimenuquin Edodesën caimpanëdash. Adnubien quënë nuntanshun Petedobëdta mëtaniaid sondado daëd uenubi utsi daëdshun shëcuë ëctabëdquin Petedo isec tabadpanëdash. Aid isquidotedi badiadnuc puduedshun isanec ushë abuctotsan nidnubi utsibotsen 4tedbidi choshon isanec ushë cuembocnoc nidoanubi utsibotsen 4tedbidi choshon isanec ushë budtsan nidnubi utsibotsen 4tedbidi choshon isanec inchështsëcnubi badiadnuc isboedo choapanëdash. Adecbidi isboed utsibo inchëshëmbi padpiden isec choapanëdash. ⁵ Adnubien Esuquidistu tantiaquido iccuededash Nuquin Papa Petedo quënën nauedaid chiec yuec onquepanëdash.

⁶ Adshumbic, Badiadshun Petedo bëmembali, quequin Edodesën tantianubi aid inchëshëmbi Petedo bucun mëtaniacchobi ushnubi ⁷ Nuquin Icbon chomiaid, ambi uaid mayan bëda, nibëdquiocboedi Petedon dayun choan quënë nuntan comapenec chënquepanëdash. Aidën Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mëtaniaid mëchiquidpanëdash. ⁸ Adtanquimbien Nuquin Papan uaid mayan bëdan: —Chinëshëdtanec tapucudta —cac Petedo chinëshëdtanec tapucudpanëdash.

Adsho isash: —Min dashcute bëntsecquid dasiuidshun ëbi tsiban —quianec nidsho ⁹ Nuquin Papan uaid mayan bëda nidsho isacbimboecquin abimbo tantienquiocquin Petedon tsibanampanëdash. ¹⁰ Adec nidquimbi sondado abëdta mëtaniaidën tantienquio icnubi datanshun shëcuë isquid daëdshumbidi tantienquio icnubi aidotsen

datanoashumbic umanuc puduenuenubi shocosh shëcuë abembi shëcniadpanëdash. Adsho isash puduenash podqued abentsëcquidën nidquimbic Nuquin Papan uaid mayan bëda abëd icboedi badedquio nidquin Petedo ni- ampanëdash. ¹¹ Abëd icboed nibëdnubien Petedo pad- piden tantiaquiec: —Edodesbëd isadaidbo, Esuquidistu tantiesabo, ëbi cuesunete bunsho isun Nuquin Papan ëbi puduenuen ambi uaid mayan bëda chomiosh. Abimbo iccosh —quianec Petedo nidpanëdash. ¹² Adec nidequi Nuquin Papan abi puduemeboed tantiequi Uan cashumbic Madcos caidën titan shubu yacno Petedo chopanëdash. Aidën tita Madia cuëmëdquid icpanë- dash. Ambobi Esuquidistu tantiaquid dadpen iccuededec Nuquin Papa chiec onquepanëdash. ¹³ Adnubien choshon Petedon shëcuë tosh-toshcasha tantiash chido yua Doda cuëmëdquid isnuec nidtopanëdash. ¹⁴ Aid shubu shëcuë yacno choshon Petedon cuënsho tantiash bëdamboshë iquequi shëcnenquio yec aubidi titinquec: —Petedo shëcuë yacno choash nidec —quequin iccuededquido chuituidpanëdash.

¹⁵ Adsho Nuquin Papa chiec iccuededquidon abimbo tantienquiocquin: —Muequi mibi nec. Aidida ispash neba —quepanëdash iccuededquido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Pa- pan uaid mayan bëda ischitashien nec —quepanëdash tantiesabo.

¹⁶ Adnubi padpiden Petedon tosh-toshcasha shëc- nequin isash: —¡Tso! Abimbo caic —quecuededpanëdash.

¹⁷ Adnubien mëdante uic-uiccaic Petedo: — Onquenquio yec tabadquin tantiata. Èbi nashunquin Nuquin Icbon naboed chuibanu —quepanëdash Petedo

abi quĕnĕn nauedacnoshon Nuquin Papan puduemiaid chuibanec. Aden chias: —Ĕbi puduemiaid Esuquidistun utsi, Acobobĕdta Esus tantiaquid utsibo chuitanta — quianec puduenanec utsi yacno Petedo nidpanĕdash.

¹⁸ Adashic, badiadnubi quĕnĕ nuntan Petedobĕd icboed sondadotedi: —ĵMitsimbo nuquibĕdta mĕtaneboed icpec? Nibĕdeque. Is —quec dacuĕdpanĕdash.

Adashic, Petedo nibĕdec, quequin sondadon chiac
¹⁹ Edodesĕn: —Nibĕntan —cac nidshun sondadon istuidenquiocsho isun quĕnĕ nuntanshun Petedo isquido ambi quĕnĕn tabadquin nabamboed chuimeshumbi aidotedi Edodesĕn cuesunemepanĕdash.

Edodes unĕsaid

Adashic, Edodes nidaid Udeya caid yacno abi tabadacnoĕsh puduanec shubu dadpen icquid Sesadeya caid yacno choash tabadpanĕdash. ²⁰ Sesadeya caid yacno anoentsĕcbidi shubu dadpen icquid Tido caid icnubi aid yacnoĕsh anoentsĕqui shubu dadpen icquid utsi Sidon caid icpanĕdash. Tido caid yacnocquidbĕd Sidon caid yacnocquido Edodesbĕd chushcananquido icboedi padenquio yanec tabadpanĕdash. Adec chushcananenquio yec tabadquin, Sesadeya yacno Edodes choash tabadosh, quesho tantiasĕd Edodesĕn yua Bĕdasto cuĕmĕdquidbĕd onquenuec cho-chopanĕdash. Cho-choshon, Ĕmbi pete nibĕdsho isun Edodesĕn menioshi. Nĕbi aid chushcainquio iquembi, quiosh, quequin cho-choquidon chuitu-idpanĕdash. Aden chiac adomboembidi Bĕdaston Edodes chuioapanĕdash. ²¹ Aden adomboembidi Bĕdaston chuioasho tantiasĕd Edodesĕn: —Ĕmbi chiacpadĕn cho-choata, quiosh Edodes, quequin chuita —cac chochoquido Bĕdaston chuioapanĕdash. Aden chiac Edodes onquesho tantianuec ambi chiacstedec ushash dashcute nac-nacquiocquid dasiuidash abembi onquenuec tsadten

abuc tsadtoash onquec taëpanëdash. ²² Aid onquesho tantiaash: —Nidaidënshun tishaid onquiaidpenquio nec. Abuc tabadquid nuquin papa caidien Edodes nechitec —quec iccuededquido comapenec cuëdcuededpanëdash. ²³ Aden chuisho tantiaash, Mimbi Nuquin Papa caidpenquio nebique. Aidi abia yampid abentsëcquiobi iqueque. Auidi tantiaata, quequin chuitiadquidëmbi chienquio icsho tantiaashun Nuquin Papan chomiaidën ambi uaid mayan bëdan daicsa uac chichan dadpen yanec Edodes badedi unëspanëdash.

²⁴ Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanëdash.

²⁵ Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebëdta Saudo meniac buanec Edusaden yacno choshon anocquido Esuquidistu tantiaquido menetanashic auëshquio puduanec Antioquiya yacno nidoapanëdash. Aidobëdi Uan cashumbic Madcos caid nidpanëdash.

13

Saudobëdtabi Bednabe nidmiaid

¹ Adashic, Esuquidistu tantiaquid utsi-utsiec Nuquin Papan yuecquio icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanëdash. Nëidic, Bednabe; utsibic, Simon, Dada Chëshë caid; utsibic, Sidene yacnoësh choquid, Dusio cuëmëdquid; utsibic, Cadidia yacnoësh choquid, tsusio dapa, Edodesën shubun icquid icboedi, Manain cuëmëdquid; utsibic, Saudo cuëmëdquid.

² Aidedishun Esuquidistuidi tantianuen buna mëmunsho Nuquin Papan Mayanën: —Saudobëdtan Bednaben

aid daëdshun ëmbi chuibocpaden ma napanuna — capanëdash. ³ Adoaquien, buna mëmunquin nainash Nuquin Papa chiec onqueshun abëd icquid utsibon mëdanten Saudo Bednabebëdta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd icquidon.

Chipide yacnoshon Esuquidistu chuibanaid

⁴⁻⁵ Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidtedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquio nidaid nacnëdquid Chipide caid yacno nidtampanëdash. Chipide yacno choash nidëqui shubu dadpen icquid Sadamina caid yacno choapanëdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebëdta chuibampanëdash. ⁶ Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabadobëd icquidon. Satanasën tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquio nebi, quequin muaquin chuiapanëdash Badesusën. ⁷ Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquio Paudu cuëmëdquid icpanëdash. Aidi tantiaquiono, quec tabadquin, Isedquido chosh, qesho tantiaish, Aidon chuibanaid tantianu, qeshun Saudobëdta Bednabe chomeshun tsusion yuedpanëdash. ⁸ Yuedac

Pabadon Esuquidistu chuibampanëdash. Saudo quequin isadaidbon cuënnubi Pabado quequin isadaidpembon cuëmpañëdash. Aden Pabadon Esuquidistu chuibansho tantiec tsusio tsadsho isun Badesusën tantiamenquiocnuen utsi uain chuioapanëdash. Ambi ompoaid ismianesa Badesus icsho Edimus cuëmpañëdash. ⁹ Aden utsi uain chuisho tantiashun Nuquin Papan Mayanën tantiamiac Edimus bëisequi Pabado: ¹⁰ —Satanasën bacuë yec bëdamboen naidbëdta bëdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaquin muaquin mimbi adenuidi chuibanegue. Tantia. ¹¹ Nëbi con Icbon mibi mëyanquin bëshu uaindac. Ushë chënquesho mimbi yuen isenquio iquendac —quepanëdash Pabado Edimus chiec.

Aden chuibon Edimusën ëshë cuen-cuempambo yec inchëshbudacbimboec yanash: —¿Tsuntsimbini mëdinhshun buampeba? —quequin nibëdacno mishquin uëmbampanëdash. ¹² Aden Edimus bëshu uacsho isec: —Nuquin Icbon chiaid abimbo iquec —quiash tsusio Sedquio Paudu cuëmëdquid Esuquidistu tantiaquid yampanëdash.

Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid

¹³ Adashic, Chipide yacnoësh puduanec nidaid Pampidia caid yacno Pabadobëd icquido canon potepañëdash. Aden potiaish nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe pudundoanec nidquin shubu dadpen icquid Pedque caid ¹⁴ isbidanec nidaid Pisidia caid yacno shubu dadpen icquid Antioquiya yacno chopañëdash. ¹⁵ Ambobi tabadequi chonoadtemaid

ushën Nuquin Papan chiaid chuibante shubun puduedash tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: — Isedquido iqueque. Aid daëdi tabadacno nidshun, ĵĒbitedi bëdambo icmenuen chuibanquin tantiametidquo ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

¹⁶ Adoaquien abi tsadacnoëshi nidtoashi Pabado: — Nuquin Papan naid mibi chiembique. Tantiaquiota. ¹⁷ Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquo bëyucanquin tsusedpabon tishmiaidën tishmiaid caidaido Equipito yacnoshon buanubi ¹⁸ tsusedpabon Nuquin Papan chiaid chieshëmpampic. Adoaquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. ¹⁹ Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. ²⁰ Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic. ²¹ Aidi isadaidbo chuiquid icnubic, Matses utsibo ancaquidpadquid bunebi, quequin tanti-

ashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmédquid, isadaidbo ancaquid icmepampic. ²² Adashic, yuecash Saudo, con shëniso, Nuquin Papan chiaid tanta uasho isun utsitsen Dabid cuëmédquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bédamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanédash Pabado aton matses Antioquiya yacnocquido tantiamenuen chiec.

²³ Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanédash. ²⁴ Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanédash. ²⁵ Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmioshi, caindami,’ quepanédash Uan acten mentoanquid —quepanédash Pabado.

²⁶ Aden Uan padon chiacpaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanédash. Adsho Nuquin Papan uincuemequin abi yacno nuquitedi puduedmequid icmequin ambi chiacpampicpaden napanédash. ²⁷ Padnuen, Aton madombo Nuquin Papan chomiaid Esus nec, quenquiocquin Edu-

saden yacnocquidobëd aton tsusio dapabo, Icsambocquid neque. Unës ua, quequin chuipanëdash. Aden chuiquin utsibëd iccuededte ushën-ushënquien abi isec onquiaid Nuquin Papan dada uamiampicpadembi aidon napanëdash. ²⁸ Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic. ²⁹ Adoaquien Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Èbi unësacsho nëidën ëbi nauedec, quequin ambi shëcuë uain nacne-
 naid chucanquio Osen Esus nauedpanëdash. ³⁰ Adoacsho Nuquin Papan Esuquidistu uincuemiatic ³¹ capusho Cadidia yacnoësh Edusaden yacno abëd capucuenoedon aidi isbempanëdash. Aden isun aidombi Esuquidistu chuibed-
 edec. Adembidi aid isboedobëdtambi abimbo chuiban-
 quidquio nebi —quepanëdash Pabado.

³² Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi ³³ Nuquin Papan uincuemiaticsho nuqui isondaaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nëbi ëmbi uincuemiaqui ëmbi chiactedi mimbi naimbu-
 doc.

Adosho isun ëbipadquiocnoc chuiquid dapa mibi
 icmembi.’

Aden ëndenquimboshë aton mado tantiaquin Nuquin Papan chiampic. ³⁴ Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icsho ëmbi bë-
 damboen isaid mibi nec, mado,’

quequin Nuquin Papan dada uamepampic. ³⁵ Ambi dada uamiampid utsi nad iquec:

‘Icsaisa icsho aton nami chodquesa icmenuna,’
quequin Nuquin Papan chiampic.

³⁶ “¿Aden dada uamequin Dabid pado chiecta on-
quepampic? Padenquo. Aidi Nuquin Papa bunacpadom-
boen naimbudquin nabanash Dabid unēsacsho isun aton
mēdimbon nami chodquiacno Dabid chococac aidēn na-
mitsen chodquepampic. ³⁷ Nuquin Papan uincuemetē-
quidēn namien chodquesa icpanēdash. ³⁸ Aidi icsain-
quiocquid yec ēbitedi icsaid bedshunash abided cuidad-
panēdash. ³⁹ Adoac abi tantiaquidquotsen icsaisabidi
Nuquin Papan isec. Nuquin Papan naden nata que-
quin dada uamiampidtedi matsesēn natiapimbo iquec.
Aden ambi chiacpaden natiapimbo yec, Nuquin Papan
bēdamboen isaid nebi, quetiapimbo icboedēmbi, Matses
icsaquid icsho cuidnushe quiash abided cuidadec Esus
unēsapanēdash, quequin tantiasho, Esuspadquid icsaisa
Nuquin Papan nuqui isec. ⁴⁰ Nuquin Papan chomiaid
choec, quequin tsusedpabon tantienquo icampidpadquid
iquenda. Aido chuiquin Nuquin Papan dada uamiampid
nad iqueque. Tantia.

⁴¹ ‘Ēmbi ēndenquimboshē dada uamiampicpadembi
adquid chomembi.

Ēmbi chomiaid isquidon chiac mimbi tantienquo icpec.
Adquid yec, Tantiadempambo iquec, quec mamēn-
shumēnquid ēbēdi tabadtiapimbo iquendac.

Adquid icmane queshun tantiaquiota’
—quepanēdash Pabado iccuededquido chiec.

⁴² Aden chuibudashic Pabado Nuquin Papan
chiaid chuibante shubu yacnoēsh abēd choboedobēd
puduenanec nidsho isash: —¿Iccuededte badiad utsi
chonoc iccuededquin chuinuecta mibi choape? —
quepanēdash iccuededquid utsibo Pabado chiec. ⁴³ Aden
chianec Pabadobēd Bednabe nidsho isun isadaidbo

utsin-utsinquiembëdtan isadaidpembo isadaidbopadquid icnuequid utsin-utsinquier tsibanampanëdash. Aden abi tsibanansho isash: —Nuquin Papan bëdamboen isaïd yec bëdamboec tabadta —quepanëdash Pabado Bednabebëd.

⁴⁴ Adashic, chonoadtemaïd ushë icnuc Nuquin Papan chiaïd tantianuec Antioquiya yacnocquid dadpen iccuededoapanëdash.

⁴⁵ Dadpen iccuededsho isash isadaïdbo tsusiobo: Ëmbi chuïbansho tantianuec aidtedi choenquïo iccosh, quequin tantiec nëishpanëdash. Adec nëishash: —Mimbi Nuquin Papan chiaïd icsamboen chuïbanec —quepanëdash Pabado caic.

⁴⁶ Adoaquien, dacuëdenquïo yec Pabadobëd Bednabe: —Mibitedi con matses icsho, Nuquin Papan dada uamiampid chuïbanu, queboedëmbi tantiesa icsho isun mibi chuïbanenquïo iquembi. Mibi tantiesa yec Nuquin Papabëd tabadte bunesabidi icnuc isadaïdpembo Esuquïdistu chuïbanendambi. ⁴⁷ Nuquin Icbon naden tantiamioshibique. Tantiã. Chuïnu.

“Isadaïdpembo ëmbi chiaïd chuïbanquïd mibi icmembali ma nidaïdtedi yacno ëbi tantiaquïdo ëbi yacno puduedquïd ma icpanuna,”
quequin chïoshi —quepanëdash Pabado abi chïeshënkïdo isadaïdbo Nuquin Papan dada uamiampicpaden chïec.

⁴⁸ Adsho tantiash isadaïdpembo: —¡Padtec! Nuquin Papan chiaïd bëdamboshë iquec —quecuededpanëdash. Adoaquien, Nuquin Papan ëbëdi mibi tabadmendambi, quequin chiaïd ambi tantiamiactedi Esuquïdistu tantiãquïd yampanëdash.

⁴⁹ Adec Esuquïdistu tantiãquïd yanash auëshquïo dadpen nïdequi nidaïd dëuequïd utsi-utsïec yacno choash tabadquin aidontsen Esuquïdistu chuïbanoapanëdash.

⁵⁰ Adosho tantiash, Pabado icsambocquïd nec,

quequin isadaidbo tsusiobon Antioquiya yacnocquidon chidobobēdta anocquido chuiquid dapa nēishmeshun Pabadobēdta Bednabe mēyantinquin ashunquio nidmepanēdash. ⁵¹ Aden nidta cac puduanec nidtuidash, Esuquidistu ėm̄bi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanēdash. ⁵² Pabadobēd Bednabe Antioquiya yacnoēsh nidan Antioquiya yacnocquid Esuquidistu tantiaquido: —Bēdambo iquebi —quecuededpanēdash. Adembidi aitedi aton Mayan Nuquin Papan menepanēdash.

14

Iconio yacno

¹ Adashic, Pabadobēd icquido Iconio yacno choash tabadpanēdash. Ambo tabadec Nuquin Papan chi-aid chuibante shubu yacno nidash puduedpanēdash. Ambo puduedshun Esuquidistu chuibanac isadaidbobēd isadaidpembo dadpen Esuquidistu tantiaquid yampanēdash. ² Aido Esuquidistu tantiaquid yanubi isadaidbo utsibo Pabadon chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nēishmepanēdash. ³ Aido nēishmiambi Iconio yacno yuec tabadquin Pabadon Bednabebēd̄tan dacuēdenquiocquin Esuquidistu chuibampanēdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobēd̄ta Bednabe icmepanēdash. ⁴ Aden icmiac aid daēdshun nadatiambocquin nasho isash, Isadaidbo tsusiobon chuibocpadec Pabadobēd Bednabe icsambocquid nec, utsi-utsiec

quenubien, Ambi chiaid abimbo iquec, utsibo quepanëdash. ⁵ Aden chuishumbic, Pabadobëdta Bednabe cues-tanquin cuënoten se-senuequin Esus tantiesabo isadaid-pembon aton tsusio dapabobëdtan cainubi adembidi isadaidbon aton tsusio dapabobëdtan cainoapanëdash. ⁶⁻⁷ Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdtan Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanëdash. Adtanec auëshquio puduanec nidshun dëuequieq shubu dadpen icquid utsi-utsiec yacnocquidotsen chuibampanëdash.

Disteda yacno

⁸ Disteda yacno tabadnubien anocquid taicsaidi anin tishaid caputiapimbo icpanëdash. ⁹ Aidi Pabadon Esuquidistu chuibansho tantiec, Esuquidistun ëbi bëdamepatsiash, quec otacquo tsadpanëdash. Aden caputiapimbocquidën tantiacpadomboen Nuquin Papan Pabadotsen tantiamiac ¹⁰ caputiapimbocquid comapenen bëisquin: —Nidto —Pabadon cac badedi nidtoash taicsaid bëdanash capupanëdash.

¹¹ Aden taicsaid bëdamic capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanëdash. ¹² Adtanequi Bednabe otacquo tsadquid icsho isash ambi tantiaid abentsëc Upited icnuc Upited cain Bednabe cuënquimbi Pabado chuiquidquo icsho isun ambi tantiaid utsi Medcudio icnuc Medcudio cain Pabado cuëmpanëdash Disteda yacnocquidon. ¹³ Aden cuënsho tantiaishun baca bënë daëd

bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaïd Upited caïd dayun uaquido baca cuesunenu, quepanëdash.

¹⁴ Aden baca cuesunenuen bësho isun abi dasiuidaid aton dashcute bëntsecquid shoyonquin cancheuidashic iccuededquidon nënantanquio nidash Pabadobëd Bednabe comapenec nadpanëdash: ¹⁵ —Ëbi daëdi mibipadquid matsesquio nebi. Mimbi tantiacmaid nebique. Baca cuesunenda. Chiaïd bëda mibitedi naden chiuuec chobi. Nuquin Papa caïd abentsëcquiobi iquec. Aidëmbi abubëdta nïdaïd uashumbic aidënquiocquidtedi uabanampidquio neque. Aiduidtsëqui tantiaquin ambi uaidbimboecnuc matsesën nacnenaïd tantiesa icta. ¹⁶ Èndenquimbo Nuquin Papan, Adoenda, cainquiocnoc matsesën ambi tantiacpaden nabampampic. ¹⁷ Aden, Adoenda, cainquiocquimbi, Abitedishun icbo icquin bëdambocquid nebi, quequin ismequin ue secamedenequinc, cuëte bacuëmequinc, nuqui penun tiedën nitsimbeniaïd canimequinc caquin Nuquin Papan nac bëdamboen nuquitedi pebededec. Aden nabanquin Nuquin Papan, Bëdambo iquebi. Cuishon, camiaïdo nuquitedi nec —quepanëdash Pabadobëd Bednabe Disteda yacnocquido chiec. ¹⁸ Aden chuido-chuidoiqui baca cuesunenuquo icpanëdash Disteda yacnocquidon.

¹⁹ Adnubien Antioquiya caïd yacnocquidobëd Iconio yacnocquido Disteda yacno cho-choshon, Pabado icsambocquid nec, quequin chiac Disteda caïd yacnocquido nëishcuededpanëdash. Adec nëishcuededshun Pabado cuënoten se-sïash, Unësosh, queshun nimbanquin buanshun shubu nibëdacno Pabado netampanëdash. ²⁰ Ambo netanambic, Esuquidistu tantiaquido cho-choshon tsi-catenubi Pabado nidtoash Esuquidistu tantiaquidobëd

Disteda yacno choec shubun puduedpanëdash. Badi-
adash puduanec shubu dadpen icquid Dedbe caid yacno
Pabadobëd Bednabe nidoapanëdash.

*Nidaid Sidia caid shubu dadpen icquid Antioquiya yacno
choaid*

²¹ Adec Dedbe yacno choash tabadquimbi
Pabadobëdtan Bednaben chuibanac Esuquidistu
tantiaquid dadpen yampanëdash. Auëshquio puduanec
nidoaic padpidec Disteda caid yacno choash tabadquin,
Dadpen tantiamequiono, quequin chuibanpanëdash.
²²⁻²⁴ Aden chuibanshumbic: —Natiamianquid iquendac.
Adquid icnuc Nuquin Papa yacno puduedash Esuquidistu
tantiaquid yec ambo nuquitedi tabadendac, quec nëbi
dayacquio yec tabad —capanëdash Pabadon. Adotanquin
ambia Esus tantiaquid utsi-utsien Pabadobëdtan
Bednaben: —Bëdamboec tabadquin ismequin Esuquidistu
tantiaquid utsibo chuiban —capanëdash. Adotanec, ambi
chuiobedobëd Pabado Bednabe chedo Nuquin Papauidi
tantiec buna mëmunquin chiec onquepanëdash. Aden
Nuquin Papa chuiquin naimbudquin, Nëmbocquid mibi
tantiaquido bëdamboen dayun uata, Papa, quequin
chianec Pabadobëd Bednabe chedo Disteda yacnoësh
nidoapanëdash. Adecbidi Iconio yacno choashun
adomboembidi chuibanoapanëdash. Adecbidi Antioquiya
yacno choashun adomboembidi chuibanoapanëdash.
Antioquiya yacnoësh puduanec nidec nidaid Pisidia
caid datambëtsenec nidaid Pampidia caid yacno choash
nidec ²⁵ shubu dadpen icquid Pedque caid yacno choash
tabadquin Esuquidistu chuibanash shubu dadpen icquid
Atadia caid yacnotsen chopanëdash. ²⁶ Auëshquio cano
antabëdtoanec nidec shubu dadpen icquid Antioquiya
caid yacno, Nuquin Papan Mayanën nidta, quequin
chiondacnombo choapanëdash. ²⁷ Ambo choash

tabadquin anocquido Esuquidistu tantiaquid utsiboböd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobëdtan Bednaben chuibampanëdash. Isadaidpembo dadpen Esuquidistu tantiaquid yamposh, quequin chuipanëdash. ²⁸ Adtanequi yuec Antioquiya yacno Esuquidistu tantiaquid utsibobëdi Pabado Bednabe chedo tabadpanëdash.

15

Edusaden yacnoquido iccuededec tantianu quiaid

¹ Pabadobëd Bednabe Antioquiya yacno choabicnubien nidaid Udeya caid yacnoësh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dëbid dëtemesa abi yacno Esuquidistun yuedtemaid nendac, quequin chuipanëdash. ² Adnubic Pabadobëd Bednabe Antioquiya yacno choash tabadquin aidon chiaid tantiash: —Nuquin Papan aden chiamo iqueque. Aden chienda —quepanëdash.

Adsho comapenec cuëdquin chushcapanëdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobëdta Bednabe chuishumbic Esuquidistu tantiaquid utsibo chuioaquin aido nidmepanëdash. ³ Adoac Antioquiya yacnoësh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanëdash. Adsho tantiash: —Aid tantiec bëdambo iquebi —quepanëdash anocquid Esuquidistu tantiaquido. Adtanec auëshquio nidequi nidaid Samadia caid yacno choash tabadquin adomboebidi chiac adquiecbidi, Bëdambo iquebi, quepanëdash anocquido. ⁴ Auëshquio puduanec

nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobëdtan Bednaben chuibanoapanëdash. ⁵ Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dëbid dëtemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanëdash.

⁶ Adoquien Esuquidistu ambia tantiaquido tsusiobobëd Esuquidistun ëbi chuibeneta caido: Tantiabono, quiash onquecuededpanëdash. ⁷ Adec yuec onquecuededash nidtoash Petedo nadec onquepanëdash: —Chuinu. Tantiata. Ënden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ëmbi chuiioasho mibitedishun tantiondac. ⁸ Ëmbi isadaidpembo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniacpadembi isadaidpembo meneoapondash. ⁹ Utsibo nec, quenquiocquin aidotsen tantiamequin paucoapondash. ¹⁰ Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? ¹¹ Padenquio icnuna. Matsestedi icsaquid icsho cuidnushe quiash abided cuidadac, quequin tantiaquiec unësash abëdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanëdash Petedo.

¹² Aden Petedon chuiquin ënambic Pabadotsen Nuquin

Papan tantiamiac ambi nadatiambocquin naquin isadaidpembo ismebanaid chuipanēdash. Adembidi Bednaben chuioapanēdash. ¹³ Aid daēdshun chuibanquin nainan Esusēn utsi Acobo, Esus tantiaquido tsusio dapa, nadpanēdash: —Ĕmbitsen chuinu. Tantiata. ¹⁴ Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aitedi nuquibēdta aton matses icmiac. ¹⁵ Adomboembidi Nuquin Papan chuimaidēn dada uampid nad iqueque. Tantia. Chuinu:

¹⁶ “Isadaidbobēd yuec tabadenquiocboedi padpidec choash aidobēd icoaindabi.

Dabid padon tsyuecquido isadenquiocboedi isadcuenendac

¹⁷ ma aton Icho matsestedishun istuidpanuna;

ma adembidi isadaidpembon ěmbi cuēnaidon aibidi istuidpanuna,

¹⁸ quec Nuquin Icho ambi ěnden tantiampicpadomboen chiaid nec”

—quiashic abi Acobo onquec: ¹⁹ —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquio ictiad.

²⁰ Nēiduidtsēqui dada uaquin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chidouidtsēqui chudta; adembidi, min bēnēuidtsēqui chudmeta; adembidi, Nēish tētaniaid intacchobi codocaid penda, quequin isadaidpembo chuibanuna. ²¹ Adec Moisesēn dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna —quepanēdash Acobo iccuededquido chiec.

²² Adashic Esuquidistu tantiaquido iccuededec onquec ěnēdshun ěmbi dada uaid Antioquiya yacno buanuec

Edusaden yacnocquid daëd nidta, quequin Pabadobëdta Bednabe nidmepanëdash. Abentsëc Udas cashumbic Badsabas cuënaid; utsibic, Sidas cuëmëdquid. Aid daëdi Nuquin Papan chiaid comapenen tantiaquidquio icpanëdash. ²³ Isadaidpembo chuiquin Edusaden yacnoshon Esuquidistu tantiaquidon naden dada uapanëdash:

“Esuquidistun ëbi chuibeneta caidobëdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobëdta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. ²⁴ Èbëd icquido nëuëshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. ²⁵ Aden chuisho tantiashun nëmbocquidobëd iccuededec onquequin abentsëcshun tantiacbimboen dada uaombi. Aidi nëmbocquid daëdi Pabado Bednabebëdta buantan, quequin chiembi. ²⁶ Unësmane, quenquio yec capucuenequin Esuquidistu chuibanquido Pabadobëd Bednabe nec. ²⁷ Adquid aid daëd icsho isun aid chedobëdta Udas Sidas chedo mibi yacno nidmembali. Adoac ëmbi dada uacpaden ma mibitedi chuioapanuna abimbo iquec camenuen. ²⁸ Nuquin Papan Mayanën ëbitedi tantiamiacpaden isadaidbon naden nata quequin chiacpaden nata mibi caisa nebi. ²⁹ Nëidtedtsëqui ëbitedishun nata caid nec: Nuquin Papan uaidbimboecnuc nacenaid tantiaquin utsibon abi yacnoshon sanaid penda; adembidi, min chidouidtsëqui chudta; adembidi, min bënëuidtsëqui chudmeta; adembidi, mimbi nëish cuesuniaid intacchobi codocashun penda. Adoac ëmbi chiacpaden nabanec mibi bëdambo icpec. Padi aidtedtsëqui chiembi.”

³⁰ Aden dada uaqin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanēdash. ³¹ Aden meniac isbanash: —Mimbi bëboed dada uaid isash bëdambo iquebi —quepanēdash isadaidpembo Antioquiya yacnocquido.

³² Adnubic Udasën Nuquin Papan chiaid chuibanquin Esuquidistu tantiaquido Antioquiya yacno tabadquido bëdamboen tantiamepanēdash. Adomboembidi chuibanquin Sidasën tantiameoapanēdash. ³³ Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unēsquo icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido. ³⁴ Adec aido Edusaden yacno nidnubien ³⁵ Pabadon Bednabe chedobēdtan Antioquiya yacno tabadquin Esuquidistu tantiaquid utsibo Nuquin Papan chiaid bëdamboen tantiamenuen chuibampanēdash.

Pabadobēd Bednabe cuëshēdaid

³⁶ Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

³⁷ Adoaquien: —Ma Madcosbidi nidoanu. Chuita —quepanēdash Bednabe.

³⁸ Adoaquien: —Chieshec aidi cuëshēdondashe. Padi. Nuqui daēdtsēqui nidnu. Nid —quepanēdash Pabado.

³⁹ Adoaquien Bednabe aden tantienquo yec Pabadobēd comapenec onquiash Madcosbēd cano antabēdtoanec Chipide yacno nidoapanēdash. ⁴⁰ Adnubien Pabado Sidas

abëd Edusaden yacnoësh choboed caic: —Nuquibi nidnuna —quepanëdash.

Adec aid daëd nidnuesho isash anocquid Esuquidistu tantiaquido: —Ma Nuquin Papan mibi daëd bëdamboen nidmequin ma mibi bëdamboen namepanuna —cac Pabadobëd Sidas nidpanëdash. ⁴¹ Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bëdamboen tantiamenuen chuibanpanëdash. Aden chuibeneshumbic nidaid Sidia yacno choshon Esuquidistu tantiaquido shubu utsinshubu utsinquec iccuededacnomboec puduedcuenequin Pabadon chuibanoapanëdash.

16

Pabadobëd Timoteyo nidaid

¹ Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobëd Sidas choapanëdash. Ambo Esuquidistu tantiaquid Timoteyo cuëmëdquid tabadpanëdash. Aidën tita isadaidbo Esuquidistu tantiaquid icnubi aidën papa isadaidpembo quidieco matses icpanëdash. ² Timoteyo bëdambocquid nec, quequin Disteda yacnocquidon Pabado chuipanëdash. Adomboembidi shubu dadpen icquid Iconio yacnocquidon chuiopanëdash. ³ Aden dadpenshun chuisho tantias Timoteyo buante bumpanëdash Pabado. Adec, Timoteyo buanu, qeshun ëbi capucueniacno isadaidbo dadpen iqueque. Aidon Timoteyo isash, Aidën papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dëbid dëtemepanëdash. ⁴ Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada

uaquin chiaid Pabadon chuiopanēdash. ⁵ Adembidi Nuquin Papan chiaid chiac ėnden Esuquidistu tanti-aquidon tantiabenquiocnobi utsi dadpen Esus tantiaquid yanoapanēdash.

Ushquin Masedonia yacnocquid Pabadon isaid

⁶ Adanec nidaid Sidisia caid yacnoēsh nidsho Nuquin Papan Mayanēn: —Nidaid Asia caid yacno Esuquidistu chuibanuec nidenda —cac Pabadobēd icquido nidaid Pidiquia caidtsen datambidanec nidaid Cadasia caidbidi datambidanec ⁷ nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tanti-ameoapanēdash. ⁸ Adoac nidaid Misia datambidanec shubu dadpen icquid Todoas caid yacno ėbi tabadac-nobi chopondash. ⁹ Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yac-nocquido: —Ėbitedi Esuquidistu chuibanec cho —quec onquesho Pabadon tantiapondash. ¹⁰ Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ėbitsen Pabadobēd nidpondabi.

Didia cuēmēdquid Esuquidistu tantiaquid yanaid

¹¹ Adanec Todoas yacnoēsh puduanec cano antabēd-toanec cuebi nidequi acte nēnantanquio nidaid nac-nēdquid Samotodasia caid yacno choash Pabadobēd icquido tabadtuidpondash. Badiadash auēshquio puduanec cano antabēdtoanec nidquimbi potebidanec nidaid Masedonia caid yacno ėbitedi chopondabi. Aid nidaidēn acte cuēmambi shubu dadpen icquid Niapodis caid yacno pudundoanec ¹² nidequi shubu dadpenquio icquid Pidipos

caid yacno domanobo dadpenquioshë tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibëdacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabadon chuibampondash. ¹⁴ Pabadon chuibanacno chido Didia cuëmëdquid shubu dadpen icquid Tiatida caid yacnoësh choquid icpondash. Aidën piucquid bednuen dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. ¹⁵ Aidbëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobëd icquido tabadpondash.

Pabadobëdta Sidas quënën nauedaid

¹⁶ Adashic padpidec Nuquin Papa chiec onquedeniacno Pabadobëd icquido nidoasho chido yuaidën bëquedtuidpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanëdash. ¹⁷ Pabadobëd icquido bëquedtuidshun tsibambëec choec aid chido: —Nëid dadatedi Nuquin Papan namiaidquio nec. Abi yacno puduedmi-anquid iquec, quequin chuibanquid nëid dadatedi nec —quec ¹⁸ badiadquidën-badiadquidënquiec comapenec cuëdpondash.

Adec cuëdtonesho tantiate bunenquio yec amibidi bidadquin mayan icsa dapuduedaid chido chuiquin comapen-nen Pabadon: —Esuquidistun nadatiamboquin naidën-

quio dapuduenta —cac badedquio mayan icsa dapuduempodash. ¹⁹ Aden dapuduemiachido bēdanacsho isun abi yuaquidon: —Nēbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantiasn nēishun Pabadobēdta Sidas bedshun nimbanguin abi chuiquido yacno chido yuaquidon buampondash. Piucquid bednuequin aton na bēshun utsibon sambanaid anoentsēqui abi chuiquido icsho isun chido yuaquidon Pabadobēdta Sidas ambo buampondash. ²⁰⁻²¹ Aden abi chuiquid tsadacno bēash: —Nēid dada daēd isadaidbo nec. Nēmbo choshon abi chuiquidon naden nata quequin chiaid chuibanec. Ēbitedi domanobo icquin ambi chiaid ēbitedishun natemaic icnuc matsestedi chushquecuededosh —quepondash chido yuaquido abi chuiquido chiec. ²² Aden chuisho tantiaquidon chiac dadpen chochoash iccuededquin Pabado bēquidon chiacpadomboen aidontsen chuioac abi chuiquido: —Bēboedon dashcute chicshun cueshcaten cuesta —cac sondadon cuespondash. ²³ Aden comapenen cuesmeshun buameshun quēnēn nauedmeshun ambi quēnēn nauedaid ista caid chuiquin Pidipos yacnocquido chuiquidon: —Puduenanec cuenushe queshun nēid daēdi bēdamboen isquiota —capondash. ²⁴ Adsho tantiasn ambi ista caidēn Pabadobēdta Sidas nēnantanquio quēnēn nauedquin tsadunshun cuate shēcuē uaidēn tausunash puduentanguin quēnē bēdamboen bētashpanēdash.

²⁵ Aden bētashash aton shubu dayunquiocquidēn puduedambic inchēshpotsembo Pabadobēd Sidas Nuquin Papa chiec onquepanēdash. Adecbidi Nuquin Papanaid chiec cuēdēmpañdash. Adec cuēdēnsho utsibon tantianubi ²⁶ comapenec nidaic ishcutnubi mētaniaidtedi mēchiquidpañdash. ²⁷ Adnubien ista caid isec tsad-

boedi ushtanec isucunquin isac shëcuë bêtashaid ênden shëcniac. Adsho isash ista caid: —Quênên nauedaido puduen-puduempacnui —quetanec: —Chuiquid dapabon ëbi cuesunemetsiash —qeshun siadnuequin chështe abi tsiusudaïd chicsho ²⁸ istanquin Pabadon: —Quênên nauedaidtedi nëmbo iquebique. Seshuniadenda —quequin comapenen cuëmpanëdash.

²⁹ Adoaquien, seshuniadtsemboedën: —Tabote bec cho —cac ambi namiaidën tabote bedtanquin meniac tabote bedshun sananec badedi quênên puduedash dacuëdec uedëquec Pabadobëd Sidas tabadacno choash danëshën sebudec shuebudpanëdash. Mibi daëdi bëdambocquid icnubi adquidpenquio nebi, quequin tantiaquin ismepanëdash. ³⁰ Adsho isun Pabadon nidtomiaqui seshuniadtsemboed bëyucanec nidquin aton shubun Pabadobëdta Sidas yuedash: —¿Nuquin Icbo yacno puduednush mit-sipadequibi ëbi icsaid cuidadpeque? Chui. Tiantianu —quepanëdash seshuniadtsemboed.

³¹ Adoaquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quiash abided cuidadec unësash Esuquidistu aton Papa yacno puduedash abi tantiaquido yuedquid neque. Mibi icsaid ênash, Esuquidistu con Icbo nec, quequin abimbo tantiaata ³² —qeshumbic seshuniadtsemboedbëd icquido Esus tantiamenuen Nuquin Icbon chiaïd Pabadon chuïpanëdash.

³³ Adoaqui Pabadobëdta Sidas cuesaid chiuë acten bëpanshunquin nainacsho aton shubun icquido Esuquidistu tantiaquido yansho isun aïdtedi Pabadobëdtan Sidasën acten mentobampanëdash. ³⁴ Aden mentobanaqui aton shubun yuedshun pemepanëdash. Adashic, Nuquin Papan chiaïd abimbo tantiaquid yec ambi bëdambo icmiaïdo seshuniadtsemboedbëd icquido icpanëdash.

³⁵ Adashic, badiadash Pidipos yacnocquido chuiquidon: —Nauedaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuiopanëdash. ³⁶ Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aidon chomi-aidën chioshibique. Dacuëdenquio yec nid —capanëdash Pabadobëdta Sidas chuiquin.

³⁷ Adoaquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquio caimbi. Ëbi daëdi puduemenuec ma chuiquid dapabo abibi chopanuna —quepanëdash.

³⁸ Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobo nec, quequin chuisho tantiasch chuiquid dapabo comapenec dacuëdcuededpanëdash. ³⁹ Adec dacuëdec nidequi nauedaid shubuno choash: —Domanobo nec, quequin tantienquiocquin mibi quënën nauedmiombi —qeshun puduemetanec: —Pidipos yacnoësh niddan —capanëdash Pabadobëdta Sidas chuiquin. ⁴⁰ Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuequin Pabadon chuibanpanëdash. Aido chuibidanec Pabadobëd icquido nidoapanëdash.

17

Tesadonica caid yacnocquido isadaidbo nëishcuededaid

¹ Pidipos yacnoësh puduanec nidequi Pabadobëd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno

choash, Nuquin Papan chiaid chuibante shubu iquec, quesho tantiash Tesadonica caid yacno Pabadobëd icquido tabadpanëdash. ²⁻³ Ambo tabadec isadaidbo iccuededte badiadën abi nidteniacpadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ënden chiampid chuibampanëdash. Nuqui icsaid bedshunash abided cuidadec Esuquidistu unësaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanëdash Pabadon. Sabado 3ted matamequin adomboen chuibampanëdash. ⁴ Aden chuibanaqui Esus tantiaquid utsi-utiec yampanëdash. Nëidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanëdash.

⁵ Aden Pabadon chuibanac Esus tantiaquid dadpen yansho isash isadaidbo utsibo nëishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nëishmiac natia chushquecuededpanëdash. Adec chushquec nidequi Pabadobëdta Sidas bednuec Ason cuëmëdquidën shubuno puduedec nidpanëdash. ⁶ Ambo choshon Pabadobëd Sidas nibëdsho isun Esuquidistu tantiaquido Asombëd icquido bedshun abi chuiquid dapabo yacno Pabado chieshënquidon buanec abi chuiquid dapabo yacno choash: —Nidaid utsi-utsiec yacno capucuenequin chuitemaid chuibanquido nëmbo ⁷ choacsho Asonën aid daëd yuedaccosh. Nuqui ancaquid Sesadën chiaid niacquin ancanquid utsi Esus cuëmëdquid iquec, quequin chuibanec —quepanëdash Pabado chieshënquido abi chuiquido chiec.

⁸ Aden, Ancanquid utsi iquec, quequin Pabadobëd-tan Sidasën chiec, quesho tantiash chuiquid dapabo ic-

cuededquidobëd comapenec chushquecuededpanëdash.
⁹ Adtanec abi chuiquid Asombëd icquido caic: —Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd icquido chuiquin. Adoquien piucquid meniac bedshun: —Min shubuno nidtan —cac nidanepanëdash Asombëd icquido.

Bedeya yacnotsen tabadaid

¹⁰ Adshumbic bednushe queshun aid inchëshëmbi Tesadonica yacnocquido Esuquidistu tantiaquidon Pabadobëdta Sidas shubu dadpen icquid Bedeya caid yacno nidmepanëdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanëdash. ¹¹ Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ënden dada uamiampid Pabaton chuibanoasho tantiashun bëdambocquid icquin, Abimbobida chuibanoshe. Isbono, quequin Nuquin Papan chiampid isban-isbampanëdash Bedeya yacnocquidon. ¹² Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidieco matses utsi-utsiec aton chido chedobëd Esuquidistu tantiaquid yampanëdash.

¹³ Adnubien, Bedeya yacnoshontsen Pabaton chuibanec, quesho tantiash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec

chushquecuededpanëdash. ¹⁴ Adsho tantiashun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidasbëd Timoteyo nidenquio yec Bedeya yacno tabadnubien ¹⁵ Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoaibi —quesho tantiashun Pabadon:

—Mibi yacno choash, Badedquio Atenas yacno chota, quiosh Pabado, quequin Sidasbëdta Timoteyo chuita —capanëdash. Aden Pabadon chiaquien Bedeya yacnocquido abi yacno nidoapanëdash.

Atenas yacnotsen Pabado tabadaid

¹⁶ Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, qeshun cainec capuquimbi Atenas yacnocquidon nacnenaid isbampanëdash. Aidon Nuquin Papan uaidbimboecnuc nacnenaid dadpen tabëcaid papa cain cuënaid ambi tantiaido icsho isash, Nuquin Papa Abentsëcquiobi iquec, quequin tantiesa Atenas yacnocquido nec, quequin tantiec Pabado unësquio yampanëdash. ¹⁷ Adec unësquio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanëdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanëdash. Isadaidbobëd onquequin Esuquidistu Pabadon chuipanëdash. Adembidi isadaidpembobëd onquequin Esuquidistu chuioapanëdash. ¹⁸ Anoshon chuibansho tantiash epicudeyo cuëmëdquidën chuinëdacpaden

tantiaquido Pabadobëd onquepanëdash. Adembidi tantiaash estoico cuëmëdquidën chuinëdacpaden tantiaquido Pabadobëd onquepanëdash. Aido Pabadobëd onquequin Pabadon Esus chuisho tantienquoio yec: — ¿Atodain comapenec onquequin nëid dadan chuipash? —quepanëdash. Adnubien utsi: —Matses utsibon papa cain cuënaid chuibanec nepanui —quepanëdash. Pabadon Esuquidistu unësash uincuenaid chuisho tantiaash adpanëdash. ¹⁹⁻²⁰ Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Midapadquidquoio mimbi chuibaneque? Tantianu. Chuiban —quepanëdash abi bëquido caic. ²¹ Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidën-badiadquidënquiec utsin-utsinquien ambi tantiacpaden chuibansho tantianuec iccuededpanëdash.

²² Aden mimbi tantiacpaden chuibanta caquien nënantanquoio nidothon naden Pabadon chuibanpanëdash: —Chuibanu. Tantiata. Mimbi papa cain cuënaid mimbi tantiaid iquec, quequin tantiembi. ²³ Capucuenequin mimbi tantiaidbimboecnuc nacnenaid dadpen isombi. Mimbi papa cain cuënaid dadpen tabëcaid icnubi mimbi cuënacmaid abentsëc iccosh. Aid mimbi cuënacmaid icnuc abibimboecnuc nacnenaid nibëdosh. Aton shubumpiuidtsëqui iccosh. Mimbi cuënacmaid mimbi tantiacmaid mibi chuibanu. Tantiata.

²⁴ “Ëmbi Nuquin Papa cain cuënaid nidaibëdtabi abu uashumbic aidënquiocquidtedi uaquidquoio nec. Abitedi uaquidquoio yec abitedishun icbombo aidi nec. Aidi tabadmenuequin matsesën shubu uashunaidën tabadesa nec. ²⁵ Aidi abitedishun Icho icnuc abitedi aton na nec. Adquid icsho, Con na mibi menenu, matsesën aid

catiapimbo iquec. Aidën tantiacpadec ëbitedi nëmbobi tabadebi. Aidën tantiacpadec ëbitedi tiboquebi. Aidën tantiacpaden ëbitedishun bedbanoaimbi. ²⁶ Aidëmbi bëyuc dada uampidën tsyuecquido ëbitedi nec. Aid bëyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taënuec ue yanendac. Adecbidi, inchështanec badiadoaic. Adecbidi, ushë nidash choaic. ²⁷ Aidëmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuntsin nabanaid nepec? queshun ëbi tantiaquin Icbo ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. ²⁸ Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantia. Chuinu: Nuquin Papan bacuëbo ëbitedi nebi, quequin min mëdimbon chuipanëdash.

²⁹ “Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquioctiadquidi matses nec. ³⁰ Ënden matsesën ambi nacnenaid aden cuënsho tantiaish Nuquin Papa, Chën. Adoenda, quenquiochoedi nëbi, Mimbi icsamboen tantiaid ënta, quequin chiec. ³¹ Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiaidën cuidbanendac. Ambi abipadquid matses icmiaid, Nuquin Papan matsesën naid chuibanquid icmenu caid unësacsho isun ambi chiampicpaden nanuequin Nuquin Papan uin-cuemepondash —quepanëdash Pabado Adeyopaco yacno iccuededquido Esus tantiamenuc.

³² Adec aidi unēsacsho Nuquin Papan uincuemepondash, quequin Pabadon chuisho tantiaash utsi-utsiec mamēnshumēnubi utsi-utsiec: —Aidēn chuiboed padpiden tantianuna —quepanēdash. ³³ Adoaquien, Pabado Adeyopaco caid yacnoēsh nidpanēdash. ³⁴ Adec nidshun yuec ushquin chuisho tantianu quec Pabadobēd iccuededquin utsin-utsinquien padpiden-padpidemboen tantiabededpanēdash. Aden Pabadon chuibanac utsi-utsiec Esuquidistu tantiaquid yampanēdash: Nēidic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

18

Codinto yacno Pabado tabadaid

¹ Adec Atenas caid yacno tabadash auēshquio puduanec nidec shubu dadpen icquid Codinto caid yacno Pabado chopanēdash. ² Ambo isadaidbo Aquida cuēmēdquid nidaid Ponto caid yacnoshon tishaid Pabadon istuidpanēdash. Isadaidbotedi nidaid Itadia yacnoēsh nidtan, ancanquidēn cac aton chido Pidisida cuēmēdquidbēd Codinto yacno choash Aquida icpanēdash. ³ Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabadon shubumpi nacnempanēdash. ⁴ Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibampanēdash.

⁵ Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenenquiocquin

isadaidbo Esuquidistu tantiamenuen Pabadon chuibanpanēdash. ⁶ Adsho, Aid tantiatiapi, quequin isadaidbon Esuquidistu icsamboen chuisho tantiash abi daēd dasiuidaid bēntsecquid chicshun ishcunec Pabado: — Esuquidistu mibitedi chiombi. Aid tantiesa yec unēsash Nuquin Papa yacno puduedenquio mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquio iquembi. Isadaidpembon tantiatsiash, quequin aido chuibanembi —quepanēdash Pabado isadaidbo tantiesa chiec.

⁷ Aden chiashic Nuquin Papan chiaid chuibante shubu yacnoēsh puduenanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash. ⁸ Uston shubunoshon Esuquidistu Pabadon chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentobampanēdash.

⁹⁻¹⁰ Adashic, yuecash inchēshēn Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ěmbi chiac dacuēdenquiocquin comapenen chuideneta. Mibi dayun uaquidquio nebi. Aden dayun uasho ěbi tantiesabon mibi natiametiapimbo iquendac —quepanēdash Pabado caic. ¹¹ Aden chiac Codinto caid yacno seta abentsēc matamiash ushē 6ted nidmec tabadquin Nuquin Papan chiaid Pabadon chuidonepanēdash.

¹² Adnubien nidaid Acaya caid yacnocquidon chushcaid chuisho tantiashun matses icsambocsho cuidte chuiquid

Cadion cuëmédquid icnubi isadaidbon Pabado bedshun abi chushcaid Cadion chuinen buampanédash. ¹³ Ambo bëquin puduedmiash: —Ancanquidën chiaid niacquin matsesën tantiatemaid nëid dadan chiosh —quepanédash Pabado chieshënquido Cadion caic.

¹⁴ Adoaquien Pabado onquetsenubi Cadiomba onquedopanédash: —Tantiata, isadaidbo. Mibi chuinu. Nèidën icsamboen nabanaid mibitedishun ëbi chuisho tantiat-siambi. ¹⁵ Aden chienquio yec, Nèidi mibi onquiaid-bëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquio nëid dada nec, mibi queopec. Aden mimbi chuisho tantiasun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. ¹⁶ Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaidon puduemepanédash. ¹⁷ Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuëmédquid bedshun isadaidbon comapenen cuespanédash. Adosho isun chiac Cadion, Icsamboen naic, quenquio yec otacquio tsadpanédash.

¹⁸ Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanédash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanédash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manédaid Pabadon matasmepanédash. ¹⁹ Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton

chido chedobëd, Nëmbobi tabadnu, quepanëdash. Adsho tantiashun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabadon. ²⁰ Aden chuibansho tantiashun: —Adomboembidi chuibanuec ¿ada ëbëd yuec tabadtsia? —iccuededquidon caquien: —Nëbi padenquio iquebi. ²¹ Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquio puduanec nidequi cano antabëdtopanëdash Pabado.

²² Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanëdash. ²³ Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auëshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bëdamboen tantiamenuen chuibanoapanëdash Pabadon.

²⁴ Adnubien isadaidbo Apodos cuëmëdquid shubu dadpen icquid Adecandedia caid yacnoësh Epeso yacno chopanëdash. Aidi dadpen tantiaquid yec Nuquin Papan chiampid tantiaquid nepanëdash. ²⁵ Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanëdash. ²⁶ Aidi Nuquin Papan chiaid chuibante shubu yacno nidshun dacuëdenquiocquin ambi tantiaid chuibampanëdash. Aden chuisho tantiash, Ëbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbëdtabi abi unësash uincuenaid chuibampanëdash Aquidabëdtan aton chidon Apodos tantiamequin.

²⁷ Aden Esuquidistu bēdamboen tantiash Epeso yacno yuec tabadquin Esuquidistu Apodosēn chuibanpanēdash. Adec yuec tabadquin chuibanashic, Nidaid Acaya caid yacno nidnu, quepanēdash. Adec nidnuesho tantiashun, naden dada uashun Apodos menepanēdash Epeso yacnocquidon: Nēid dada uaid sananquid Apodos cuēmēdquid Esuquidistu tantiaquid nec. Ĕmbi isaid neque. Yuedta, quequin dada uashun, Apodos Epeso yacnocquidon menepanēdash ma nidaid Acaya caid yacnocquido Esuquidistu tantiaquido Apodosēn menenu, queshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bēdamboen tantiamenuen chuibanpanēdash. ²⁸ Aden chuibanquimbic isadaidbo Esuquidistu tantiesabo icsho isun abēd onquequin, Esuquidistu Nuquin Papan Chomiaid nec, quequin Nuquin Papan chiampid Apodosēn chuibanpanēdash.

19

Epeso yacno Pabado abēd icquido tabadaid

¹ Codinto yacno Apodos icnubi Pabado nidaid Pidiquia caid yacnoēsh puduanec podquedēn choec macuēsh dapa dectatocuētsenec shubu dadpen icquid Epeso caid yacno choapanēdash. Ambo choshon Esuquidistu tantiaquido istuidshun: ² —¿Esuquidistu tantiaquido icshoda Nuquin Papan aton Mayan mibitedi menepanēdash? —capanēdash Pabadon.

Adoaquien: —Nuquin Papan Mayan iquec, quequin tantiamboccombi —quepanēdash Epeso yacnocquido.

³ Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icsho acten mentondashi —quepanēdash Epeso yacnocquido Pabado chiec.

⁴ Adoaquien: —Mibi icsaid ënta, qeshun abimbo tantiaquidtedi acten mentobanquin, Ĕbi tsibanec choquid Esus tantiaquid icta, quequin Uan padon chuipanëdash —quepanëdash Pabado Epeso yacnocquido chiec. ⁵ Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanëdash. ⁶⁻⁷ Aden aitedi acten mentoacsho mëdanten Pabadon mamishbanac aid doseted Nuquin Papan aton Mayan menepanëdash. Aden meniac abi onquiacmaidënquio onquec Nuquin Papa chiec cuëdëmpañdash Epeso yacnocquido.

⁸ Adashic Nuquin Papan chiaid chuibante shubun puduedshun Pabadon Nuquin Papabëd tabadaid chuibampanëdash. Cuembo tantiamenuëquin ushë choaid 3ted nidmequin badiadquidën-badiadquidënquien dacuëdenquiocquin Nuquin Papan chiaid Pabadon chuibampanëdash. ⁹ Aden chuisho tantiash pamumëdacbimboec tabadquin, Tantiatiapibi, quequin utsin-utsinquien chieshëmënquioquin Esuquidistu icsamboen chuipanëdash. Aden chiac Esuquidistu tantiaquidobëd Pabado, Nidnu, quianec Nuquin Papan chiaid chuibante shubu yacnoësh puđuanec nidec Tidano cuëmëdquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash. ¹⁰ Seta daëd matamequin adomboembi chuibampanëdash Pabadon. Aden chuibansho tantiash nidaneshun chiac nidaid Asia caid yacnocquidon tantiapanëdash. Adoac isadaidbobëd isadaidpembo Esus tantiaquido yampanëdash. ¹¹ Epeso yacno Pabado tabadsho Nuquin Papan nadatiambocquid icmiacsho ¹² Pabadon dada cuëscashun dashcute cuëshë buanshun daicsaid mishbanac bëdampanëdash. Adembidi Pabadon dada

cuëscabanaidën nënquid mishac bëdampanëdash. Adembidi pashuaidtsen pamishac bëdanoapanëdash. Adembidi mishac mayan icsa dapuduempanëdash.

¹³ Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chui-boedënquio dapuduen —capanëdash. ¹⁴ Pabado tanuequido isadaidbo chuiquid Esqueba cuëmëdquidën mado 7ted icpanëdash. ¹⁵ Aden chiaquien mayan icsa: —Esus iquec, quequin ëmbi tantiaid aidi nec. Pabado iquec, quequin ëmbi tantiaidbidi aidi nec. ¿Mibitedi tsutsi neque? Tantikanu. Chui ¹⁶ —qeshun nebudquin dashcute ched-chedcapamboen mayan icsan cuesactaniaqui shubu nuntanuësh puduenanec cuempanëdash Esqueban mado. ¹⁷ Adec cuensho isquidon chiac Epeso yacnocquid isadaidbobëd isadaidpembo dacuëdcuedepanëdash. Adec dacuëdquin, Dacuëdampambo iquec. Esuquidistu bëdambocquid nec, quequin tantiabedepanëdash. ¹⁸ Esuquidistu tantiesä icboedi Esuquidistu tantiaquid yanec dacuëdenquio yec Esuquidistu tantiaquido iccuededacno nidshun abi icsaid chuibampanëdash. ¹⁹ Adquid dadpenshun icsamenuen ambi ompoquin naid ismenquioeboedombi, Nëbi adquid ictiapibi, quequin cuëte dëtsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi tauipanëdash. Aden tauiboed menequin piucquid dadpen bedtsiandac, quepanëdash. ²⁰ Aden abi icsaid dada uate tauisho isquidon chuibanac Esuquidistu tantiaquid dadpen yampanëdash.

²¹ Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquio iquebi —quepanëdash Pabado.

²² Aden chiasn Asia caid yacno abi tabadquin Masedonia caid yacno abia Timoteyobēdta Edasto nidmeapanēdash Pabadon.

²³ Aid daēdi nidan Epeso yacno tabadquin Esuquidistu Pabadon chuibanaquien tantiesabo nēishpanēdash.

²⁴ Adquid Demetedio cuēmēdquid Diana caidbimboecnuc nacnemequid icpanēdash. Aidēmbi ambi nacnemaiid menequin piucquid dadpen bedbampānēdash.

²⁵ Aden Esuquidistu tantianu quesa icquin ambi Dianabimboecnuc nacnenta caidobēdta abipadquid Diana nacnemequid utsibo iccuededmeshun Demetediōn nadopanēdash: —Nuqui tantiaid Dianabimboecnuc nacnenshun menequin piucquid dadpen nuqui bedbanec.

²⁶ Aden nanubi nidaid utsi yacnoēsh Pabado cuēmēdquid nēmbo choshon utsi comapenen chuibanac Epeso yacnocquid dadpembēdtn nidaid Asia caid yacnocquid dadpēshun tantiec. Dianabimboecnuc nacnenaid tiboquesa iquec. Adquid matsesēn tantiaid abimbo ictiapimbo iquec, quequin Pabadon chiec. ²⁷ Aden chiac matses dadpēshun tantiasn Dianabimboecnuc nacnenquido icsambo iquec, quetsiasn ēbitedi caic. Adecbidi, Dianabimboecnuc nacnenaidbēd abi tabadte shubu uashunaid icsambo iquec, queoapēc. Adecbidi Dianabimboecnuc nacnenaid tiboquesa icsho matsesēn tantienquio ictiadquidi nec, queoapēc Pabado. Aden chiac nidaid Asia yacnocquidon dadpēshun Diana tantiaboedombi padenquio yampec. Aidēmbi tantienquio yanshun aidbimboecnuc nuqui nacnenaid bedenquio iquēdac —quepanēdash Demetedio.

²⁸ Aden chiac ambi chomeboedtedi, Piucquid ēbi menequin ēmbi nacnenaid matsesēn padpidēn bedenquio ictiasn, quec nēishash: —Epeso yacnocquidon tantiaid Diana bēdambo iquec —quec comapēnec cuēdcueded-

panëdash. ²⁹ Adec comapenec cuëdcuededsho tantiash Epeso yacnocquid utsibo aidobëd cuëdcuededpanëdash. Adec cuëdcuededquin nidaid Masedonia caid yacnoësh Pabadobëd choboed Cayobëdta Adistadico bedshun iccuededte shubu yacno cuëdcuededquidon buampanëdash. ³⁰ Aden aid daëd bedshun buansho isquidën chiac Pabado, Iccuededte shubu yacno nidnu, quesho tantiashun: —Padi. Ambo nidenda —capanëdash Esuquidistu tantiaquidon. ³¹ Adembidi, anocquido chuiquid utsin-utsinquien Pabado chuioapanëdash.

³² Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bëo? quequin tantienquo yec tabadpanëdash. ³³ Adnubien, Nuqui tantiacpadomboen chuitan, quequin isadaidbon Adecandedo cuëmëdquid nënantanquo tsi-cunepanëdash. Aden tsicunequien nidtoash: —Tantia. Chuinu —quequin ³⁴ daëdpactsëc chiec onquesho tantiash onqueboedi ënëdash tabadnubi: —Isadaidbo aid nec —quesho tantiash: —Epeso yacnocquidon Diana cain ambi tantiaidbimboecnuc nacnenaid bëdambo iquec —quec baded-badedquiec cuëdcuededpanëdash.

³⁵ Adec cuëdcuededshobien Epeso yacnocquidon naden nata quequin chiaid dada uaquidën ënëdmenuequin nadopanëdash: —Epeso yacnocquidon tantiaata. Chuinu. Diana caidbimboecquid abucuësh paëdaidbimboecnuc nacnenaid nuqui comapenen tantiaidbëdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. ³⁶ Aden utsibon tantiec, quequin tantiaquin icsamboen nainda. ³⁷ Dada daëd mimbi nëmbo bëboed Diana caidën shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenquioccosh. ³⁸ Adenquo icnuc Demetediobëd icquido abi chushquiaid

chuihuec Epeso yacnoquidon naden nata quequin chiaid tantiaquid yacno nidshun ³⁹ mimbi tantiacpaden chuita cuëdcuededenquiocquin. ⁴⁰ Comapenec cuëdcuededec qesho tantiash ancanquid dapan Epeso yacnoquido bëdamboen tabadmeta caid yacno nidshun chiac, Ancanquid dapan chiacpadec Epeso yacnoquido tabadenquio iqueque. Cuëdcuededquido chome, nuqui catsiash. Aden chomiac ¿atotsi nuqui chuipe? ⁴¹ Aidën nuqui chomensushe quiash min shubuno nidaneta — capanëdash Epeso yacnoquidon naden nata quequin chiaid dada uaquidën. Aden chiac Demetediobëd iccuededquido nidanepanëdash.

20

Masedonia yacnoquido isbidanec nidequi Quedesia yacnoquido isbidanec nidaid

¹ Natia cuëdcuededboedo nidanian Esuquidistu tantiaquido chomias Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. ² Auëshquio puduanec nidquin nidaid Asia caid yacnoquid utsi-utsien chuibidanec nidaid Quedesia caid yacno choapondash Pabado. ³ Ambo choash ushë abentsëc chotsëcnuc nidmec tabadash: —Nidaid Sidia caid yacno nidnu —quepondash. Adsho tantiashun: —Ambo nidacsho mibi cunesunuequin isadaidbon cainec —cac nidaid Masedonia caid yacno Pabado nidoapondash. ⁴ Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo

cuëmédquid; utsibic, shubu dadpen icquid Dedbe caid yacnoësh choquid, Cayo cuëmédquid; utsibobi, nidaid Asia yacnoësh choquido: nëidic, Timoteyo cuëmédquid, utsibic Tiquico cuëmédquid, utsibic Tedopimo cuëmédquid. Aidedi icpondash. ⁵ Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. ⁶ Aidedi nidan pan nami uainquioctequid pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

Eyutico unësacsho uincuemiaid

⁷ Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshpotsembo yantsëcquiec. ⁸ Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. ⁹ Pabado onquenubi nëbi caniaid, Eyutico cuëmédquid, iste shëcuë yacno tsadec ushcasmash ushtotanec abucuësh paëdpondash. Adec paëdsho isash bud-budshun unësacsho isbedednubien ¹⁰ Pabadotsen budquin dayumbudec: —Unësboedi abi tiboquianeque. Shubicuededenda —quepondash. ¹¹ Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquiec. Adec badiadbudbon Pabadobëd icquido shubu nuntanuësh puduem-puduenubien ¹² paëdboed aton shubuno utsibobëd nidpondash bëdambo yec.

Todoas yacnoësh puduanec Mideto yacno chute

¹³ Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi.

¹⁴ Adec nidequi Ason yacno choshon istuidac Pabado ëbëdi cano antabëdtoanquin potiash shubu dadpen icquid Mitidene caid yacno choapondash. ¹⁵ Auëshquio puduanec nidec badiadash acte nënantan nidaid nacrëdquid Quio caid datambidanec nidash badiadash acte nënantan nidaid nacrëdquid utsi Samos caid datambidanec shubu dadpen icquid Mideto caid yacno choapondash.

¹⁶ Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

Epeso yacnocquido tsusiobo Pabadon chuibanaid

¹⁷ Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. ¹⁸ Aden chomeshun naden aido chuipondash: —Chiembique. Tantiata. Ëbi ënden nidaid Asia caid yacno choash mibëd yuec tabadquin nabanaid mibitedishun istenepondac. ¹⁹ Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi.

²⁰ Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi

shubu utsin-utsinquec puduedcuenequin chuibanondambi. ²¹ Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

²² “Aden chuibanshobi Nuquin Icbon Mayanën: Edu-saden yacno nidta, quequin chuioaposhi. Aden aidën chuibocpadequi nidebi. ¿Atotsi ëbi capatsiash Edu-saden yacnoquidon? quec dacuëdenquio yec nidebi.

²³ Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. ²⁴ Aden Nuquin Papan Mayanën chuisho tantiashi, Ëbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

²⁵ “Nëshunquio Nuquin Papan chiaid ëmbi chuibansho mibitedishun tantiabenonaidon nëuëshquio ëbi nidacsho mimbi isoainquio iquendac. ²⁶ Ëmbi nëshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac.

²⁷ Tantienuioctsiash, quenquiocquin Nuquin Papan tantiacpaden chuibanombi. ²⁸ Aden chuibanash nëbi nidebi. Ëbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuc Esuquidistu unëspanëdash.

²⁹ Ëbi nidan abimbo chiacbimboen chuiquid Esuquidistu tantiaquido chuiquid icnuec choendac. ³⁰ Adembidi

mibëdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. ³¹ Adquid Esuquidistu tantiec iccuededquido cuëshëdmequid neque. Ista. Adquid iquendac, quequin mibëdi tabadquin ënenquiocquin chuibanondambi. Adquid choec, quequin mibitedi chiec shubiondabi.

³² “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. ³³ Mibëd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. ³⁴ Ëmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ëbëd capuquido menebanondambi. ³⁵ Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icbo Esuquidistu nidaidën tabadec nadpanëdash: ‘Utsin natiapimbocsho menequid Nuquin Papan bëdambo iquebi camiaid nendac. Nabanenquio yec bedshumënuquidquio icsho Nuquin Papan bëdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabadon.

³⁶ Aden chiashic Pabado Nuquin Papa chuinuec utsi-bobëd danëshën sebudcuededash onquecuededpondash. ³⁷ Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. ³⁸ Ëbi padpiden mimbi isoainquio iquendac, Pabado quesho tantiash shubicuededpondash. Adec shubiquin dayumbudash unësquio yec Epeso yacnocquido tsusiobo Pabadobëd cano yacno nidanepondash.

21

Edusaden yacno Pabado nidoaid

¹ Epeso yacnocquido tsusiobo acte cuëman tabadnubi cano antabëdtoanec Pabadobëd capuquido nidquimbi cuebi potiash acte nënantan nidaid nactëdquid Cos caid yacno choapondash. Badiadnuc auëshquio puduanec nidec acte nënantan nidaid nactëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. ² Ambo choashic nidaid Penisia caid yacno cano dapa utsin nidnuequid istuidash antabëdtoanec Pabadobëd capuquido nidoapondash. ³ Adec nidquimbi acte nënantan nidaid nactëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. ⁴ Aden buan-buanubi Esuquidistu tantiaquido yacno nidanec puduedash 7tedec ushec Pabadobëd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. ⁵ Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadobëd acte cuëmano choash Nuquin Papa chiec onquecuededpondash. ⁶ Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano choboedo aton shubuno nidaneopondash.

⁷ Adec cano antabëdtoanec auëshquio nidec shubu dadpen icquid Todemaida yacno choash Pabadobëd capuquido tabadtuidpondash. ⁸ Adec anocquidobëd tabadec badiadash cano antabëdtoanec nidec Sesadeya

caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash. ⁹ Aidën champibo 4tedi aton bënën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰ Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash. ¹¹ Adec choshon Pabado tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ĕmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac —quepondash Accabo Pabado chiec.

¹² Aden Accabon chuisho tantiash shubiquin Pabado bëd cho boedon Uedipen shubun icquidobëdtan, Edusaden yacno nidenda, quequin Pabado chuioapondash. ¹³ Adoquien: —¿Atotsi canuen shubiquin ëbi icsambo icme? Edusaden yacno nidshun Nuquin Icbo Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna —quepondash Pabado. ¹⁴ Adoquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icbo bunacpadece nidpanuna —capondash.

¹⁵ Aden chiashic Sesadeya yacnoësh puduanec Edusaden yacno Pabado bëd capuquido nidoapondash. ¹⁶ Adec nidsho isash Sesadeya yacnocquid Esuquidistu tantiaquid utsi-utsiec Pabado bëd nidquin Menason cuëmëdquidën shubu yacno buanac puduedpondash. Aid

shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

Pabadon Acobo isaid

¹⁷ Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. ¹⁸ Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash. ¹⁹ Adec nidec ambo puduedshun, Mibi isec chobi, quequin, Ęmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

²⁰ Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. ²¹ Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²² Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquoio icmenuequin ¿Atotsi nuqui napeba? ²³ Naden nac bëdambo ictsiashe. Tantia. Chuinu, Pabado. Nëmbo ëbëd icquido Nuquin Papauidi tantiec tabadnuequid daëd-daëdquieic iquec. ²⁴ Nuquin Papan ëbi bëdamboen dayun uadenesho ismenu, quiash nidaid Quedesia yacnoësh, Ębi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnenuquid piucquid men-emi,” quepondac. Nëbimbobi Edusaden yacno mibi choac. Nëid dadatedibëd Nuquin Papa tabadte shubu

uashunaid yacno nidshun mimbi ënden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquio Pabado nec, quequin tantiatsiash. ²⁵ Ëmbi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nëidtedictsëqui mimbi natequid nendac. Nëidic, Nuquin Papan uaidbimboecnuc nacenaid tantiaquidon pete sanaid penda; adembidi, min chidouditsëqui chudta; adembidi chidon min bënëuidi chudmeta; adembidi, nëish cuesaid intacchobi codocaid penda.” Aden dada uabanquin isadaidpembo chiombi — quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbëd choash Pabado, Nëidted dadabëdtambi ëmbi Nuquin Papan chiaacted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷ Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoësh choquidon isadaidbon ispondash. Aden isash Pabado bedmete bunec, Isadaidbo utsibo nëishmenu, quec: ²⁸ — Isadaidbotedishun tantiata. Nëidëmbi Nuquin Papa tabadte shubu uashunaidën puduedtemaid isadaidpembo yuedquin nëid shubu bëda icsa uameboed neque. Bednu. Uidën uaic cho —quequin abimbo chiacbimboec onquecuededpondash. ²⁹ Epeso yacnoësh choquid isadaidpembo Tëdopimo Pabadobëd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec titin-quec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shëcuë bêtashpondash. ³¹ Aden Pabado buanec, Cuesunenu, quec cuëdcuededsho tantiashun chuitanac ³² abi chuiquidbëd sondado cho-chosho isun Pabado cuesbed-edquin isadaidbon ëmpondash.

³³ Adec choshon sondado chuiquidën bedtan cac Pabado bedshun shocosh bucun mëtanemepondash. Aden mëtanemiash: —¿Tsutsi nëid nepec? ¿Atotsi icsamboen naosh? —quepondash sondado chuiquid.

³⁴ Adoaquien iccuededquid utsi-utsitsëcquien chiec onquecuedednubi utsi-utsitsëcquien utsi uain chiec cuëdcuededpondash. Adec dadpen cuëdcuededsho: —Tantiatiapibi ye. Quënën nauedmenu. Buanec nid —quepondash sondado chuiquid sondado chiec. ³⁵ Aden Pabado buanec nidec nauedte shubun dectatonobi cuëdcuededquidon tsucuscuededtsëcquien Pabado bednuesho isun Pabado abuc cadoanquin sondadon buampondash. ³⁶ Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

Ambi nabanaid iccuededquido Pabadon chiaid

³⁷ Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne? ³⁸ Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi. ³⁹ Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquoio tabad, quequin ismequin Pabadon mëdante uic-uiccapondash. Aden nasho isash isadaidbo otacquoio tantiec tabadsho isash: —Ebedeyon, nuquin onqueten mibi chuinu —quec naded Pabado onquedopondash:

22

¹ —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

² Adec aton onqueten Pabado onquesho tantiash isadaidbo otacquoio tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquoio tishaqui Edusaden yacno choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. ⁴ Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quënën nauedmeshun unës uamepondambi. ⁵ Ëmbi adobanquin naonaid tsusio dapatedishun tantiec. Adondash, quequin chuitiadquoio icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

⁶ “Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiacimboec chënquequin dëcatepondashi. ⁷ Adec chënquequin dëcatiac nidaidën paëdshun nadec abucuësh onquesho tantiapondambi. ‘¿Atotsieshun ëbi mëyane, Saudo? Èbi chui. Tantuanu,’ capondashi.

⁸ “Adoquimbi: ‘¿Con Icbomboda mibi ne?’ capondac.

“Adoquien: ‘Nasaded yacno iccondaïd mimbi mëyanaid Esus nebi,’ capondashi.

⁹ “Adnubic ëbëd icquidon shocosh bed-bedquiacimboec chënquesho isequi con Icbon chuïsho tantienquo yec tabadpondash.

¹⁰ “Aden dëcatiac uequin ëmbentsëqui tantiec: ‘¿Atot-simbi nape, Icbo?’ quepondabi.

“Adoquien: ‘Nidtoash Damasco yacno nidtan. Anoshon ëmbi nata quequin chiaïd utsin mibi chiendac,’ capondashi Nuquin Icbon. ¹¹ Adoquini nidtoquin shocosh bed-bedquiacimboec chënquequidën bëshuacsho isun ëbëd icquidon mëdinanquin Damasco yacno buampondashi.

¹² “Adec Damasco yacno choash bëshuash ëbi tsad-nubi Ananias cuëmëdquid ëbi isec chopondash. Aidi isadaïdbon naden nata quequin chiaïd naquidquïo icsho isadaïdbo utsibon bëdamboen isaidquïo icpondash. ¹³ Èbi yacno choshon aidën: ‘Saudo, abuc is,’ cac cuedoquimbi Ananias ispondambi.

¹⁴ “Adsho isash Ananias: ‘Nuquin tsusedpabon Papa cain cuënaïdën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaïd, Icsa Nibëdquid mibi ismendac. Aidën chuïsho mimbi tantiendac. ¹⁵ Aden aid isquin tantiashun utsi-utsien dadpen mimbi isaidbëdta mimbi tantiaïd

mimbi chuibenendac,’ quequin ¹⁶ chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacbimboen utsibo ismenuen acten mentometa,’ capondashi Ananiasën.

¹⁷ “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacbimboec tsadpondabi. ¹⁸ Adec tsadquimbi Nuquin Icbo ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquio nidtan, quequin Nuquin Icbon chuipondashi.

¹⁹ “Adoaquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. ²⁰ Adembidi, mibi chuibanquid Esteban cuëmëdquid utsibon cuënoten se-sequin unës uanubi sesequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icbo chiec.

²¹ “Adoaquini Nuquin Icbon: ‘Isadaidpembo yacno mibi nidmembique. Nidtan,’ capondash —quepondash Pabado ambi nabanaid iccuededquido chiec.

Pabado cuestsenaïd

²² Pabado ambi nabanaid chuibansho tantiec iccuededquido otacquio tabadboed, Isadaidpembo, quec Pabado onquesho tantiash: —Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata —quec cuëdcuededpondash iccuededquido.

²³ Adec cuëdcuededec aton dashcute bëntsecquid canchepamboec dachiquidshun nidaïd putu bedtanquin abuc

secapondash Pabadon chuiboed tantiatemaid nec, quequin ismequin. ²⁴ Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash. ²⁵ Adoaquien cuate nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidënshun tishaid icsho ëmbi naid chuimiabida ëbi cuese? —quepondash Pabado sondado chuiquid chiec.

²⁶ Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bëboed: “Domanobon nidaidënshun tishaid nebi,” quiosh —quepondash sondado chuiquid comandante chiec.

²⁷ Adoaquien Pabado yacno nidshun comandanten: —¿Domanobon nidaidënshun tishaidta mibi nepe? —capondash Pabado chuiquin.

Adoaquien: —Ai, domanobon nidaidënshun tishaidquio nebi —quepondash Pabado.

²⁸ Adoaquien: —Domanobon nidaidënshun tishaidpenquo ëbi icsho, ¿ada adquid ëbi icmetsia? quequin picquid meniondambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

²⁹ Aden Pabadon chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mëtanemechitombi, quequin tantiec comandante dacuëdpondash.

Isadaidbo tsusiobo iccuededacno Pabado buanaid

³⁰ Adshumbic, badiadshun ambi mëtanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquio Pabado nidtomepondash.

23

¹ Aden nidtomiaquien isadaidbo tsusiouidi comapenen isec: —Utsibo, ëmbi naid chuibanu. Tantiata. Nuquin Papan isnubi ambi naden nata quequin chiaid nabanquidquo icteniobi —quepondash Pabado.

² Aden chuisho tantiashun: —Muaquin chieque. Èccues —Isadaidbo tsusio dapan Ananiasën cac Pabadon dayunquio icquidën Pabado èccuespondash.

³ Aden èccuesaquien Pabado: —Mibi icsaid nibëdacbimboec mibibi tsadsho Nuquin Papan mibi èccuesmendac. Nuquin Papan naden nata quequin chiaid tantiembi, quequimbi ëbi èccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

⁴ Aden Pabadon chuisho tantiash aton dayunquiocquidquo: —¿Aden Nuquin Papan isadaidbo tsusio dapa icta caid chiash dacuëdenquioda ique? —quepondash.

⁵ Adoaquien: —Èmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquo icsho ëmbi chuibocpaden chienquio ictsenombi. Mimbi abimbo chioc. Èmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ĕbibi padiseyobon tishmiaid nebi. Adquid yec, Unēsash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin Ĕbi mimbi chiec — quepondash Pabado iccuededquido caic. ⁷ Aden Pabadon chiaquien saduseyobo, Uincuenta nibēdendac, quequin Ĕmbi tantiacpaden Pabadon tantienquio iquec, quec comapenec onquecuedednubi padiseyobo, Uincuenta iquendac, quequin Ĕmbi tantiacpaden Pabadon tantiec, quec comapenec onquecuededpondash. ⁸ Unēsash uincuentequid nibēdec, quec saduseyobo. Adecbidi, Nuquin Papan uaid mayan bēdabēd ambi uaid utsi mayan nibēdec, queoac saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bēda, ambi uaid utsi mayambidi iquec, queoac.

⁹ Aden ambi tantiacpaden chuibanec comapenec onquec saduseyobobēd padiseyobo natiambo cuēdcuededpondash. Adec onquec cuēdcuedednubi padiseyobo, Nēid dada bēdambocquid nec. ĴMayanēn chioshi, qeshodambi muec nec capadi? Adecbidi, ĴNuquin Papan uaid mayan bēdan chioshi, qeshodambi muec nec caopadi? Padenquio iquembi. Pabadon chuiboed abimbo iquec, quepondash padiseyobo saduseyobo caic. ¹⁰ Adec comapenec onquec natiambo chushcanansho tantiashun comandanten: —Podon shoyonquin canite dēchicnushe qeshun mēnchicshun shubu nuntan bēoata —cac sondadon Pabado mēnchicpondash.

¹¹ Aden mēnchicshun shubu nuntan sondadon yuedaquien Pabado ushash badiadash padpidec inchēshēn Pabado ushnubi Nuquin Icbo chopondash: —Mimbi Edusaden yacnoshon Ĕbi chuibanacpaden

shubu dadpen icquid Doma caid yacnoshontsen mibi chuibamembique. Dacuëdenquio yec dayacquio icta —capondash Nuquin Icbon Pabado chuiquin.

Pabado cuesunenu quequin ompoquin cainaid

¹²⁻¹³ Adec Pabadobëd Nuquin Icbo onquebombien badiadash isadaidbo 40ted Pabado cuesuniabi icquin buna mëmunembi, quequin abimbo chiembi, quepondash.

¹⁴ Aden nanu quiash isadaidbo tsusiobo yacno nidash: —Pabado cuesuniabi icquin buna mëmunembi, quequin muenquiocquin chuibanombi. ¹⁵ Èbitedishun ompo-

quin Pabado cuesunenuquin cainubien mimbi comandante chuitanta caid naden chuimeta: Pabadon naid bëdamboen tantianuna. ¿Ada padpiden isadaidbo tsusiobo iccuededte shubuno bëmeoatsia? quequin chuitan Pabado bëmeoatsiashe. Aden Pabado sondadon bësho Pabado cuesunenuna —quepondash Pabado cuesunenuquido isadaidbo tsusiobo caic.

¹⁶ Aden aidon chuishobien Pabadon piaquën tantiashun Pabado yacno nidshun chuioapondash aton piaquën.

¹⁷ Adoaquien Pabadon sondado 100ted chuiquid cho, cata cac nidshun aton piaquën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta —Pabadon cac ¹⁸ buampondash.

Aden Pabadon piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

¹⁹ Aden chiaquien Pabadon piac mëdinanquin udictsëc buanash comandante: —¿Atotsi ëbi chuinuec cho? —quepondash comandante.

²⁰ Adoaquien Pabadoñ piac: —Badiadshun isadaidbon ambi namiaid mibi yacno chomec. Aden chomiac nẽmbo choshon naden chiec: “¿Ada isadaidbo tsusiobo iccuededte shubuno Pabado mimbi bẽoapatsia? Aidẽn naid chuibansho bẽdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. ²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bẽmetsiash, quequin tantiaquin Pabado con cu cuesunenuquin caineque. Nidmenda. Con cu cuesunenuquid: “Pabado cuesuniabi icquin buna mẽmunembi,” quiosh. Con cu cuesunenuen nẽbimbobi podqued cuẽmanshun ompodshon cainec —quepondash Pabadoñ piac comandante chiec.

²² Adoaquien comandanten: —Isadaidbon chiaid mimbi chuiboed utsi chienquo yec nidec nid —capondash Pabadoñ piac chuiquin. ²³ Aden Pabadoñ piac nidmeshun sondado 100ted icquido chuiquid daẽd chomiasch comandante nadpondash: —Enden inchẽshan Sesadeya yacno ma mibẽdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuiyoata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuiyoata. ²⁴ Adembidi Pabado bẽd icquido cobednadod Pediques yacno buanun cabayo nacnenta —capondash comandanten sondado 100ted chuiquid daẽd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin: ²⁶ “Quẽdaudio Disias nebi. Chuiquid dapa cobednadod caid, Pediques, mibi bẽdambocquid icsho chuinu. Pabado ẽmbi bedboed mibi yacno buamenuen dada uaimbique. ẽmbi dada uaid

isec onqueta. ²⁷ Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiashun sondado dadpemböd choquin mënchiccombi. ²⁸ Aden mënchicshumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. ²⁹ Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabadon chuisho tantiashun quënën nauedenquioctiadquidi nauedmepondash, quequin tantiashumbi quënën nauedmeopombi. ³⁰ Aden Pabado quënën nauedmeoashumbic, Podqued cuëmanshun Pabado cuesunenuequin isadaidbon cainec, qesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuequido mibi yacno nidmembi. Adoac ma ambibi Pabadon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobödta nëid cobednadod Pediques menenuen buanta —capondash comandanten.

³¹ Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. ³² Ambo choash badiadshun sondado cabayo catsadquidonuidquio Pabado buanec nidnubi sondado ut-sidedi aucbidi nidaneoapondash. ³³ Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbödta Pabado Pediques menepondash cabayo catsadquidon. ³⁴ Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoaquien Pabado: —Nidaid Sidisia caid yacnoshon tishaid nebi —quepondash.

³⁵ Adoaquien: —Mibi icsambocquid nec, quequin chuiquido isadaidbo choacsho mimbi nabanaid chuimembi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista —capondash sondado chuiquin.

24

Pediquesën tantianubi Pabadon ambi naid chiaid

¹ Adashic, 5tedec ushash isadaidbo tsusio dapa Anianisbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. ² Aido chosho isun Pediquesën Pabado chomiacsho isun isadaidbo tsusiobon tantiacpaden chuinuequidën Tedtudon naden Pediques chuipondash: —Mibi chuinu. Tantia. Chuiquid bëdambocquid icquin mimbi bëdamboen nabanac isadaidbo bëdamboec tabadec. ³ Mimbi aden nabansho isun, Bëdambocquid mibi nec, quequin mibi chiembi. ⁴ Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

⁵ “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaïd tantiaquido tsusio nec. Aidëmbi nidaidtedi yacno nidshun ambi tantiaïd chuibanquin isadaidbo comapenen chushcamequin cuëdcuededmiac cuëshëd-cuëshëdposh. ⁶ Aidëmbi Nuquin Papa tabadte shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi

cuidte bumpobi. ⁷ Aden cuidnu quenubien comandante Disias cuëmédquid choshon Pabado mënchicanquin buamposh. ⁸ Pabadon ambi naid chuisho mimibi tantiashun, Isadaidbo tsusiobon abimbo chiosh. Icsambocquid nec, quequin mimbi chuioapatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuec.

⁹ Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

¹⁰ Adsho tantiashun, Onqueta, quequin mädante uicquin Pediquesën ismiac Pabado nadec onquepondash: —Chuiquid dapan tantiata. Ëmbitsen chuinu. Dadpen seta matamequin con matses isadaidbo abi chushquiaid tantiashun mimibi bädamboen tantiacpaden namedenioc. Adquid mibi nec, quequin tantiaquin, Ëmbi naid chuibanec bädambo iquebi, quec dacuëdenquo yec onquebique. Tantiata. ¹¹ Edusaden yacno choash ambobi 12tedec ushobi. Ëbi anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. ¹² Ambo puduedash utsiböd chushcananenquo yec tabadsho istuidash, Icsambocquid nec, queposh. Adembidi chuibanquin utsibo nëishmequin chushcamenquo iccombi. Pabado icsambocquid nec, quequido Pabadon chiaid abimbo iquec, quetiadquidi nec. ¹³ Ëmbi naid Tedtudon chuibamboed, Abimbo iquec, quetiapimbo iquec tsusiobo. ¹⁴ Nëiduidtsëqui abimbo iqueque. Chuinu. Tantia. Nuquin tsusedpabo chuimiapaden Nuquin Papan chomiaid tantiesä isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquo

nebi. ¹⁵ Adembidi, matses unēsacsho Nuquin Papan uincuemiāc abi tantiaquid abēdi tabadnubi abi tantiesa chian anēdēnquequid nēsecaindac, quequin tantiēmbi isadaidbo tsusiobon tantiacpadēmbi. ¹⁶ Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matstedishun, Bēdamboen mimbi naoc, capashuni, quequin adomboembidi bēdamboen nabanec tabadec nebi.

¹⁷ “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiash piucquid menenuēc choapobi. Adembidi, Nuquin Papan bēdamboen dayun uabenioshi, quequin piucquid menenuēc choapobi. ¹⁸ Aden menenuēc abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. ¹⁹ Ēbi capusho istuidquido isadaidbo nidaid Asia caid yacnoēsh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nēshuntsen adomboembidi chuitiadquidi nec. ²⁰ Adembidi isadaidbo tsusiobon: ‘Padiseyobo yec bēdambocquid nec,’ quequin ēbi anoshon chiacpadēmbidi nēshuntsen adomboembidi chuioatiadquidi nechitec. ²¹ Anoshon nēiduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ēbi mibi chiec caimbi —quepondash Pabado Pediques chiec.

²² Aden Pabado chuisho tantiash Pediques tanti-aidquid iquec: —Nēbi mimbi aidtedquio chuibansho tantiēmbi. Comandante Disias nēmbo choan mibi padpiden chuimēmbi —quepondash Pediques Pabado chiec. ²³ Aden chuishumbic naden Pediquesēn sondado chuipondash: —Shubuno Pabado buanshun puduednushe

qeshun ista. Abi menenuequid abi isnuequid chedo chosho isun yuedta —quepondash Pediques ambi Pabado ista caid chiec.

²⁴ Adashic, daëdpactsëc ushash Pediquesbëd aton chido, Dusidia cuëmëdquid chopondash. Aton chido isadaidbo icpondash. Adec aton chidobëdi choshon abi yacno Pediquesën bëmiacscho ambi tantiaid Esuquidistu Pabadon chuibanac Pediquesën tantiauidpondash. ²⁵ Aden chuibanquin Pediques Pabadon nadopondash: Utsin abi utsibëd chushcananaid chuibanacscho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuiopondash Pabadon. Adembidi, Esuquidistu tantienquo icsho chian anëdënquequid Nuquin Papan nësecanushe quequin Esuquidistu tantiaata, quequin Pabadon chuiopondash. Aden Pabadon chuisho tantias: —Padi. Ĕmbi naid nibëdsho isun padpiden chuimenuen mibi bëmeoaimbique. Nëbi nidec nid —cac Pabado nidpondash. ²⁶ Adshumbic, adembidi abi yacno Pabado Pediquesën bëmeded-bëmededpondash. Nidtiadquo icquin piucquid Pabadon ëbi menetsias, quequin tantiaquin Pabado bëmiash aibdëd Pediques onquepondash.

²⁷ Adashic, seta daëd matamiash Podsio Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ëbi cain chuibededpec, quequin Pediquesën Pabado shubun nauedshun niampondash.

25

Pabadon ambi naid Peston chuimiai

¹ Pesto cobednadod yanash Sesadeya yacno choash 3tedec ushanec Edusaden yacno nidpondash. ² Adec Pesto Edusaden yacno choash tabadsho isadaidbo tsusiobo, Pabado chushcaquido: ³ —¿Ĕbitedi bēdambo icmenuequin Pabado Edusaden yacno ada bēmeoatsia? —quepondash Pesto chiec. Pabado bēsho cuesunuequidon cainshun cuesuneppec, quequin tantiakin isadaidbo tsusiobon aden Pesto chuipondash.

⁴ Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi. ⁵ Pabadon ic-samboen naosh, quec utsi-utsiec ĕbēdi nidshun anoshon Pabadon naid icsa ĕbi chuita —quepondash isadaidbo tsusiobo caic.

⁶ Adashic, 10tedec ushash Edusaden yacnoĕsh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoшон Peston Pabado bēmepondash isadaidbo tabadnubi. ⁷ Aden bēmiacsho isash Pabado dĕcatec isadaidbo Edusaden yacnoĕsh choboedo Pabadon naid chiec abimbo chiacbimboec onquecuededpondash.

⁸ Aden isadaidbon chiaquien: —Ĕmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobĕd puduedambocobi. Adembidi, empedadod Doma yacno tabadquid, Sesad cuĕmĕdquidĕn chiaid niacamboccombi —quepondash Pabado.

⁹ Adoaquien: —¿Edusaden yacno buanac anoshon adomboembidida isadaidbo tsusiobo chuioatsia? —quepondash Pesto Pabado chiec. ¿Edusaden yacno Pabado ada bēmeoatsia? quequin isadaidbon

chiacpaden nanuec Pesto adpondash. ¹⁰ Adoaquien Pabado: —Domanobo ancaquidën empedadod caidën, Sesad cuëmëdquidën, Mibi yacnocquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabado chiec, quequin mimi tantiec. ¹¹ Icsambocquidquio iquec Pabado unës uame, qesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenuec, Empedadod ëmbi naid chuite bunebi, quequin dada uaindambi —quepondash Pabado Pesto chiec.

¹² Aden Pabado chuisho tantiash Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buame-nuna —quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³ Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash. ¹⁴ Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiad Pabado cuëmëdquid chuinu. Tantiata. Aidi abi iquec shubu nuntan. ¹⁵ Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

¹⁶ “Adoaquien, Mibi abëdi chushquiaid Pabadontsen chiamboen unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. ¹⁷ Aden chiac nëmbo choshon abi chushquiaid aidon chuisho tantiec

tsadnuen Pabado bëmiombi. ¹⁸ Aden Pabado bëmiacsho ëmbi tantiacpaden abi chushcaquidon Pabadon naid chienquiocposh. ¹⁹ Ëmbi tantiaidpenquoio Esuquidistu unësash uincuenaid Pabadon tantiaid icsambo iquec, quequin chuiposhi isadaidbo tsusiobon. ²⁰ Aden ambi tantiaidquoio bëdamboen tantienquoio yec nadpobi Pabado caic. Min matsesën naden nata quequin chiaid tantienquoio iquembique. Edusaden yacno buamiac mimbi naid anoshon chiac bëdambo ictsias, quequin chiombi. ²¹ Adoaquien: ‘Empedadod, Sesad yacno nidshun ëmbi naid chuitiadquoio iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëm-bobi Pabado quënë tabadec —quepondash Pesto Pabado chiec Aquidipa tantiamenuequin.

²² Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

Aquidipa ambi naid Pabadon chiaid

²³ Aden Peston chiaquien badiadash bëdaidquoio da-siuidash Aquidipabëd aton chuchu choash iccuededte quënë puduedash sondado chuiquido chuiquid utsibobëd aid daëdi tabadpondash. Aido tabadsho isun Peston Pabado bëmepondash. ²⁴ Bëmiac Pabado nënantanquoio nidtonobi Pesto nadpondash: —Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioshi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioaposhi. ²⁵ Aden chuisho tantiashun nëid ambi naid chuimeopombi. Aden Pabadon chiaidtsen tantiashun, Nëid unës uatiapimbo iquebi, quequin tantiapombi. Aden

ëmbi tantianubi, Empedadod yacno nidshun ëmbi naid chuite bunebi, quequin Pabadon chuiposhi. Adoac Doma yacno aidi buamenuna. ²⁶ Aden buamenuen jatotsimbi dada uaquin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiashun, Naden dada uata, mimbi cac dada uatsiambi. ²⁷ Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

26

¹ Aden Peston chiaquien: —Mibibi onquequin mimbi naid chui. Tantianu —quepondash Aquidipa Pabado caic.

² Adoquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi. ³ Isadaidbon naden nata quequin chiaidbëdta abi onquiaid mimbi tantiec. Aden tantiaquid mibi icsho ëmbi nabanaid ëmbi chuibansho tantiata. Chuinu.

⁴ “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. ⁵ Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. ⁶ Unësash uincuente iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo. ⁷ Nuquin tsusedpa Acobo isadaid caidën madobon tsyuecquidon, Unësacsho Nuquin Papan uincuemetete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo

tsusiobon. ⁸ Nuquin Papan nadatiambocquin uincuemete chiaid mimbi tantienquo icpe.

⁹ “Ënden ëmbitsen tantiauidquin shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, qeshun adobampondambi. ¹⁰ Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bëdambocquid icsho bedshun quënën nauedmepondambi. Unës uanu, qesho tantiash, Ai, unës uatiadquo iqueque. Adota, quepondabi. ¹¹ Nuquin Papan chiaid chuibante shubu utsi-utsiec yacno nidted-nidtedondabi aido mëyamenuc. Esus, Nuquin Papan madopenquo nec, aido camenuen mëyamepondambi. Adembidi nidaid utsi yacnoshontsen adquid istuidshun mëyameoapondambi.

¹² “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. ¹³ Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuinu. Ancanquid dapan tantiata. ¹⁴ Aidën dëcatiac ëbitedi nidaidën uebudcuededondabi. Adec uequimbi con matsesën onqueten ebedeyon onqueten abucuësh onquesho naden tantiondambi: Saudo, ¿atotsieshun ëbi tantiaquido mimbi mëyampe? Ëbitsen mëyantiadpambocquin mimbi aido mëyanec, quec onquequin chiondashi.

¹⁵ “Adoquimbi: ‘¿Tsutsi mibi ne, Icbo?’ caondac.

“Adoquien, Mimbi mëyanaid Esus nebi. ¹⁶ Ëmbi nami-aid mibi icmenuc chobi. Esus isombi, quequin ¿ëbi chuibeneta caid nëbi mibi yanec? Ëbi chuibenequin mimbi isaidbëdta ëmbi yuecshun ismetequid chuibeneta. ¹⁷ Aden ëbi chuisho mibi cuesunete bunquid isadaidbobëd

Isadaidpembo icsho mibi mënchiquendambi. Adquid chuibanta, quequin mibi nidmembi. ¹⁸ Aden chuibanac utsin-utsinquier pashuacbimboecboedëmbi tantiendac. Icsambocquid nebi, quequin tantienquioeboedi, Icsaobique. Èbi pauc, Papa, quependac adquid. Mayan ic-san yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmi-aid ëbi tantiaquid utsibëd iquendac, quequin Esusën chuipondashi.

¹⁹ “Aid abucuësh onquesho tantiasun chieshenquiocquin chuibenionbi caimbi, mibi chuiquin Aquidipa. ²⁰ Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanoaondambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiacpaden nabanta, quequin chiombi. ²¹ Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. ²² Padnuen ëbi dayun uaquid Nuquin Papa icquin isadaidbon cuesunenushe qeshun cudasëmposhi. Adoac nëid ushënquio mibëdtabi mimbi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tanta. ²³ Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash —quepondash Pabado

iccuededquido chiec.

²⁴ Adec Pabado onquesho tantiash: —Min tantiate icsabudash mibi onquec. Mimbi tantiaid dadpen iquec tantienquo yec onquechitequien mibi nec —quepondash Pesto Pabado caic.

²⁵ Adoaquien Pabado: —Bëdamboen tantiec onquebi. Ęmbi chiaid abimbo iquec, caimbi mibi ancaquid Pesto. ²⁶ Ancanquid Aquidipan ěmbi chuibamboed abimbo iquec quequin tantiec. Aden aiděn tantiasho dacuědenquiocquin aid chiemi. Ęmbi chuibamboed ompoenquiocquin isquidon chuisho aiděmbi tantiapondash. ²⁷ Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabado Aquidipa chuiquin.

²⁸ Adoaquien Aquidipa: —ĵMimbi chuiboedtedtsěqui tantiashtabi Esuquidistu tantiaquid yampe? — quepondash Aquidipa Pabado chiec.

²⁹ Adoaquien Pabado: —Esuquidistu tantiaquid ěbipadquid miběd iccuededquidtedibi Nuquin Papan icmepashun. Něid ushěnquo daědpactsěc chiombi. Aidtedtsěqui chiac tantiatiapimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mětaniaid ěbipadquid ma mibitedi iquenquiocpanuna —quepondash Pabado.

³⁰ Aden Pabado chuibanaquien ancanquid Aquidipa nidtopondash. Nidtosho isash Pestoběd Bedenise iccuededquid utsibo chedo nidtocadoedpondash. ³¹ Adec nidtocadoedash puduenash onquecuededec: — Chuibamboed icsamboen nainquioccosh. Adoenquiocsho uněs uainquioctiad. Adembidi ěnden quěněn nauedenquiocpatecnědan —quepondash ancanquido.

³² Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmet-senosh —quepondash Aquidipa Pesto chiec.

27

Doma yacno Pabado buanaid

¹ Adashic, Nēbi mētaniaido nidaid Itadia caid yacno buanac bēdambo iqueque. Pabadobēdta mētaniaid ut-sibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuēmēdquid icpondash. Domanobo ancaquid tantiec aid cuēmēdacpadec Aucustobo nebi quec sondado 100ted-bēdi abi chuiquid abibi cuēmēdpondash. ² Aden buanta cac Pabadobēdta utsibo bedshun acte cuēmano buan-shun cano dapa Adadamitio cain cuēnaid istuidpondash. Aid cano dapa istuidashien, Icbo, nidaid Asia caid cuēman shubu dadpen icquid utsi-utsiec yacno nidtuidebi, quequin chuisho tantiaash Pabadobēd antabēdtopondabi. Adec antabēdtosho isash puduampondash. Pabadobēd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoēsh choquid icpondash.

³ Adec cano antabēdtoanec nidquin shubu dadpen icquid Sidon caid yacno buampondash. Ambo choash, Mitsana nibēdeque. Mibi yuedquid yacno nid. Aidon mibi menetsiash, quequin Pabado bēdamboen tantiaquin sondado chuiquidēn, Udion, chuipondash. ⁴ Adshumbic Sidon caid yacnoēsh puduanec nidquin potesho cunquequidēn bēquedtuīdac ushē choacmi cuenadtanquin acte nēnantan nidaid nācnēdquid Chipide caid datampondash. ⁵ Adembi nidaid Sidisia caid ēquē datanash nidaid Pampidia caid ēquētsen datanec nidaid Disia caid yacno

choash nidquin shubu dadpen icquid Mida caid yacnotsen canon buampondash. ⁶ Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadoböd icquido aid canontsen antabëdtomepondash. ⁷ Adec Mida yacnoësh puduanash nidquin potec dadpen ushacsho cunquequidën cano bëquedtuiddpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nacdëdquid Quideta caid yacno buanoapondash. Uquë cuëma utsiuc Sadmon caid icpondash. ⁸ Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

⁹ Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabadon nadopondash: ¹⁰—Chuinu. Tantiata. Nëuëshquio puduanquin potesho cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin. ¹¹ Aden Pabadon chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. ¹² Cunquequid dapa cunquequid dapanquib Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquequid, quequin ut-sitedishun chuipondash.

Acte dapa potesho cunquequid dapanquio cano bëquedte

¹³ Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. ¹⁴ Adec nidequi udictsëc yanshobi ushë cho-choaid ëquëctscshun Quideta caid nidaid mananucuësh cunquequid dapa choquin bëquedtuiddquin ¹⁵ icbon cano nidmetiapimbocnobi cano buampondash. ¹⁶ Aden cunquequidën buanaqui acte nënantan nidaid nactëdquid utsimpi Quëdauda caid ëquëbictsëc cuenadquimbi canompi cano dapan nëshun buanaid buanushe qeshun anandopondash. ¹⁷ Aden canompi anandoshon cano dapa canchednushe qeshun uidën uaquin datanebanshumbic cano buante dashcute abi dectante cuestebëdtabi imbudshun dashcute chicacsho cunquequidën cano comapenen buampondash. ¹⁸ Aden cano cunquequid dapan buanubi badiadnuc acte natiambo tëccoasquesho isun ambi ansandoshon bëboed acte nësiapondash. ¹⁹ Adshumbic 3tedec ushun bucu dënëshun cano dashcute indotetedi nësiaoapondash. ²⁰ Aden nësecanec nidquimbi inchëshën ushëbëdta uispa abu chëshën bëtinacsho isenquio iccondambi. Adembidi badiadën ushë isenquio iccondambi. Dadpen ushquin aidtedi isenquioccondambi. Aidted isenquiocnobi acte comapenen tëccoascapondash. Ad icsho isash, Bënudchitequien nuqui iquec, abitedimbo quecuededpondash.

²¹ Adequi nuqui iquec, qeshun buna mëmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoësh puduanenda caombi. Adsho tantiaboshi tantienquio yec mibi puduampoc. Ëmbi chiacpaden nabanuc mimbi ansandoaidtedi abi ictsiandac. Adecbidi, Unësebi, quenquio nuqui ictsiandac.

²² Padnuen acte tëccoasquenubi nuquitedi unësenquio

iqueque. Dacuëdenquio yec dayacquio icta. Canouidi canched-canchedendac. ²³ Nuquin Papan namiaidquio nebi. Adquid icscho inchëshën ambi uaidën mayan bëdan ambi chomiaidën naden chioshi: ²⁴ “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibëd icquidtedi acte yacnoshon mënchiquembique. Dacuëdenquio yec tabad,” caposhi Nuquin Papan uaid mayan bëdan. ²⁵ Aden aidën chiac dayacquio icta. Nuquin Papa ambi chiacpaden nabanquid nec, quequin tantiemi. ²⁶ Adembidi, acte tēcçoasquequidën nuqui acte nënantan nidaid nacrëdquid cuëmano buanshun cano cancheshunendac, quequin tantiombi —quepondash Pabado canon antabëdtoaido chiec.

Cano canched-canchedaid

²⁷ Adashic, Buenos Puetos caid yacnoësh ënden nidboshi 14tedec ushec acte Adidia caid yacnoshon cunquequidën buampondash. Aden acte tēcçoasquequin buanubi inchëshpotsembo yanuc, Cuëma anoentsëquien nuqui choendac, quequin cano nidmequidon tantiapondash. ²⁸ Aden tantiaquin, ¿Tionda iqueque? Tanu, qeshun yuëmbocquid shocosh bucu dëdectanshun pumbudquin tampondash. Aden tanshun, Aidiompenquio iquec, quequin chuipondash. ²⁹ Nidaid cuënote dapa cunquequidën buanquin cano semenushe qeshun cano uidën uate dapa yuëmbocquid tsitsumi tsidectanshun acte nënequin uidën uash ma badiadbono quiash tabadpondash. ³⁰ Adec tabadnubi cano nidmequido cuenueshun dëbiate yacnoshontsen cano uidën uate yuëmbocquid dëdectanuequin abimbo chiacbimboen canompi anandoboed nënetsempondash. Cano dapa mentoadtsiash, qeshun cuenuequin

adopardash. ³¹ Adec aido nidtsenubien Pabado: — Cuenuequido canompin nidnuc cano dapan nidquido nuqui mentoadendac —queopardash sondado chuiquid caic. ³² Aden Pabodon chiaquien abi dectante bucutedi sēnac canompi nēpaēdopardash cuenuequido nidtiapimbo yec.

³³ Adashic, badiadte anoentsēc yanubi Pabado nadopardash: —Catodtseted ushec, Mentoadtsiabi, quequin tantiaded-tantiadedtsēcquin mimbi piamboccoc. ³⁴ Mibi mentoadenquio iqueque. Min manēdaid abentsēc paēdenquio iqueque. Penquiocboedi unēschitomane quenquiocquin peta —queopardash Pabado. ³⁵ Aden chuishumbic utsitedi ismequin pan bedshun Nuquin Papa chuishun pan cuēshun Pabodon peopardash. ³⁶ Aden Pabodon pesho isun, Nuquitsen penuna, qeshun abitedishun pebededopardash. ³⁷ Cano antabēdtoquido 276ted icopardash. ³⁸ Aidtedshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiopardash, Cano yuēmbo iquec, qeshun.

³⁹ Adshumbic, badiadnuc ambi isacmaid nidaid istuidopardash. Acte cuidiantanquid cuēmambi masi icsho isun ambo cano nidmenueshun ⁴⁰ uidēn uaid tebanac acte nēpaēdopardash. Adembidi, cano dēbidiadmete bucutedi seccudoashun cano dēbiateno buanquin dashcute shoyontanquimbi cadoopardash, Cunquequidēn acte daēd naccuēscananacno buampashuni, quequin. ⁴¹ Aden cano nidmenubi cano dēbiaten masi setuidec dēchiquidtiapimbo yec cano dapa dētocqueopardash. Adec dēchiadash acte tēcçoasquequidēn cano dapa canche-canchequin tauopardash.

⁴² Adsho isash sondado, Mētaniaidtedi cuentsiashe. Cuesunenu, qesho ⁴³ tantiash Pabado cuesunenushe qeshun: —¡Chēn! —capopardash sondado chuiquidēn.

Aden chuishumbic, Acten tantanec mëquiadquido tantanec nidanenubi ⁴⁴ tantantiapimbocquido cano cuësh-cuëshëdaid bedbanash noadec tantanquido tsibanec nidta, quequin chuipondash sondado chuiquidën canon antabëdtoquido chuiquin. Aden ambi chiacpadquiec nidanec mentoadenquio yec abitedi nidaid yacno choash dectatocuededpondash abitedi.

28

Madta caid yacno Pabadobëd icquido choaid

¹ Adec nidaid yacno choash dectatoneshun, Nëid acte nënantan nidaid nactnëdquid Madta caid nec, qesho tantiabededpondash. ² Ambo tabadquidon abitedi bëdamboen yuedpondash. Iquen uampamboec ue sequenubi Madta caid yacno chosho isun cuëte dëtsiadoshon, Cuëec cho, quequin chuipondash. ³ Adnubic Pabadontsen cuëte tanunquiocquid bedtanquin tsindouquin masandopondash. Aden masandoaid nëdënquiacnoësh puduenquin nisin Pabado mëpepondash. ⁴ Aden mëpiash ëcchiquidenquio yec mëdiadsho isashien anocquido: —Nisin piaid cuesunianquid nepanui. Mentoadenquio yec actenuësh dectatoacsho nisin piac unëschitequien iquec. Abi icsaid cuidtequidien nechitec.

⁵ Adec onquecuedednubien Pabadon comapenen uicac nisi cuëte dëtsiadoaidën nëpaëdpondash. Adnubien Pabado abi bëdambo icpondash. ⁶ Aden Pabadon uicac nisi paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquiocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

⁷ Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid

icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. ⁸ Adnubien Pudion papa chumbo yec pieneç aton madon shubu nuntan uepondash. Adec Pudion papa uec quesho tantiash Pabado aid isec nidshun ashunquiobi Nuquin Papa chuishumbic Pudion papa damishquin bëdamepondash Pabado. ⁹ Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Èbitsen bëdametsiash, quiash cho-chosho aidotsen bëdamepondash Pabado. ¹⁰ Adosho isun canon choquido bëdamboen tabadmepondash anocquidon. Nidnuesho tantiashun menebampondash mitsana nibëdec quequin.

Doma yacno Pabado choash tabadaid

¹¹ Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quiash tabadash: —Nidnu. Nid —quianec aton cano antabëdtosho isun Pabado bëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacnenaid icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash icbon. ¹² Aidën puduanec nidequi acte nënantan nidaid nacrëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³ Ambo tabadash puduanquin aid acte nënantan nidaid nacrëdquid cuëma anoentsëqui potequi nidaid Itadia caid cuëmano choashun shubu dadpen icquid Dequio caid yacno buampondash. Ambo choash

ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. ¹⁴ Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquio icquid Doma caid yacno chopondash Pabadobëd icquido. ¹⁵ Podqued Apio caidën choec, quequin chuituidac Esuquidistu tantiaquid Doma yacnocquid utsi-utsiec Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnocquido Pabado bëquedoaic nidaneoapondash. Aido cho-chosho isashien, Èbi dayacquio icmenuen nëidtedi mimbi chomioc, Papa, quec dayacquio iquebi, quiampondash Pabado. ¹⁶ Adec aido bëquedec choash aubidi nidec Pabadobëd Doma yacno choapondash. Doma yacno choacshobien Pabado quënën nauedenquiocquin shubun tabadmepondash sondado abentsëcshun abëd tabadquin isnubi.

Doma yacnoshon Pabadon Esuquidistu chuibante

¹⁷ Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiacsho isun Pabadon nadopondash: Chuinu. Tantiata. Nuquin matses icsamboen nainquioccombi. Adem-bidi nuquin tsusedpabon naden nata quequin chiaid nicambo iccombi. Adoenquiocshobi Edusaden yacnoshon nuquin matsesën bedshun domanobo chuiquid menion-dashi. ¹⁸ Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. ¹⁹ Aden domanobo chuiquidën tantianubi nuquin matses tsusiobon, Unës uatiad,

quequin chiac, Empedadod, Sesad yacno nidshun ěmbi naid chuite bunebi, quequin chuipondambi, Con matses icsambo iquec, quenquiocquin. ²⁰ Ěmbi chuiboed mibi chuinuequin mibitedi chomiombi. Uněsash uincuente nec, quequin tantiaquin nuquin matsesěn cainacpaden cainquid icsho mětaniaid nebi —quepondash Pabado isadaidbo tsusiobo chiec.

²¹ Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoěsh choquido, Pabado icsambocquid nec, quequin chienquioccosh. ²² Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

²³ Aden Pabaton tantiaid tantianuec, Něidted ushash padpidec choaindabi, quianec nidanepondash tsusiobo. Adec nidaniash ambi chiatedec ushash Pabado tabadacno choapondash isadaidbo tsusioboběd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quiash abided ciudadec Esuquidistu uněspanědash. Aid tantiaquid yec Nuquin Papaběd tabadendac, quequin Pabaton chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbědtabi Nuquin Papan naden nanun chiaid ambi utsibo dada uamiampid chuibampondash Pabaton. Ambi dada uamiampiděn chiaid Nuquin Papan madombo Esuquidistu nec, quequin badiadnubi chuiquin tauashun inchěshbudtsěqui chuiquin ěmpondash Pabaton. ²⁴ Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵ Aden abentsěc tantiacbimboen tantiatiapimbo yec comapenec onquesho tantiashien

Pabado nadpondash. —Nuquin Papan Mayanën Isayas dada uamequin nuquin tsusedpabo naden chuipampic:

²⁶ “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac;

Adembidi Ĕm̄bi nadatiambocquin nabanaid isted-istedquimbi abimbo isenquo iquendac.

²⁷ Bēdamboen tantiaboedobi nēbi min matses pamumē-dacbimboec tabadec; pashuacbimboen tantiec tabadoaic; ushacimbocbidi tabadoaic.

Adec tabadenquiocquin ěm̄bi nabansho mimbi istsiac. Adembidi ěm̄bi chiaid mimbi tantiatsiac. Aden tantiashun mibi icsaid mimbi ěntsiac.

Adquiduidi ěm̄bi bēdambo icmiaid nendac.”

²⁸ Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado ²⁹ Nuquin Papan dada uamiampicpaden chuiquin isadaidbo Doma yacnocquido tantiamenuc. Aden chuisho tantiash isadaidbo nidanepondash.

³⁰ Adembidi seta daēd matamec tabadquin Pabadon Esuquidistu chuibampondash. Aton shubun tabadquin abi isedec choquidtedi Pabadon yuedpondash. ³¹ Utsi, Chēn, quenquiocnobi dacuēdenquiocquin, Nuquin Pababēd tabadte iquec, quequin huibampondash. Adembidi Esuquidistu tantiamenuc chuibampondash Pabadon.

Padi. Esuquidistun, Ĕbi chuibeneta, caidon naid chuibanquin aitedi dada uaombi, Teyopido.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

